

大元  
倉庫  
海運  
記

附元海運志

(國學文庫第參拾七編)

總發售處

北平隆福寺街  
文殿閣書莊

(國學文庫第參拾七編)

大元  
海運記

附元海運志

總發售處

北平隆福寺街  
文殿閣書莊

大元倉庫記……………一

大元海運記卷上……………三

大元海運記卷下……………七

歲運糧數……………七

收江南糧鼠耗則例……………六七

南北倉添鼠耗則例……………九〇

再定南北糧鼠耗則例……………九二

排年海運水腳價鈔……………九三

漕運水程……………九六

記標指淺……………一〇〇

測候潮汛應驗……………一〇三

艘數裝泊……………一〇五

元海運志……………一一五

附錄七種……………一二八

# 大元倉庫記

國之有倉廩府庫所以爲民也我朝倉庫之制北則有上都宣德諸處自都而南則通州河西務御河及外郡常平諸倉以至甘州有倉鹽茶有局所以供億京師賑恤黎元者其措置之方可謂至矣

在京諸倉

隸京畿漕運司

相應倉五十八間可貯糧十四萬五千石簷柱高一丈二

尺椽長一丈四尺八椽中統二年建每十間用物赤栝椽五百四十赤栝方二百二十五椽一千七百三十四板瓦三萬四千七百六十條輒六萬八千一百三十九重脣三百三十六副合脊連勾一千一十六副溝六百七十七穰子五百三十三稱箔子四百一十四石灰二萬二千六百六十四斤麻刀六百二斤紫膠一十斤煤子四十斤石礎五十五竹雀眼二十四片五寸釘八千一百六

十二六寸釘三百五十六三寸釘四千五百四十七寸釘四百八寸鎊子一百  
高廣工物以下同 千斯倉八十二間可貯糧二十萬五千石中統二年建  
通濟倉十七間可貯糧四萬二千五百石二年建 萬斯北倉七十三間可貯  
糧一十八萬二千五百石二年建 永濟倉七十三間可貯糧二十萬七千五  
百石至元四年建 豐實倉二十間可貯糧五萬石四年建 廣貯倉一十間  
可貯糧二萬五千石四年建 永平倉八十間可貯糧二十萬石十六年建  
豐閤倉一十間可貯糧二萬五千石十六年建 萬斯南倉八十三間可貯糧  
二十萬七千五百石二十四年建 既盈倉八十二間可貯糧二十萬五千石  
二十六年九月建 既積倉五十八間可貯糧十四萬五千石二十六年九月  
建 盈衍倉五十六間可貯糧一十四萬石二十六年十一月建 大積倉五  
十八間可貯糧一十四萬五千石二十八年建 廣衍倉六十五間可貯糧一

十六萬二千五百石二十九年建 屢豐倉八十間可貯糧二十萬石皇慶二  
年二月建 大有倉八十間可貯糧二十萬石二年二月建 廣貯倉六十間  
可貯糧一十五萬石二年二月建 廣濟倉六十間可貯糧一十五萬石二年  
二月建 豐穰倉六十間可貯糧一十五萬石二年二月建  
通州諸倉 迺積倉七十間可貯糧一十七萬二千五百石 及稔倉七十間  
可貯糧一十七萬五千石 富衍倉六十間可貯糧十五萬石 慶豐倉七十  
間可貯糧十七萬五千石 延豐倉六十間可貯糧十五萬石 足食倉七十  
間可貯糧十七萬五千石 廣儲倉八十間可貯糧二十萬石 樂歲倉七十  
間可貯糧十七萬五千石 盈止倉八十間可貯糧二十萬石 富有倉一百  
間可貯糧二十五萬石 南狄倉三間 德仁府倉二十間 林舍倉三間  
河西務諸倉隸都漕運 大盈倉八十間可貯糧二十萬石 充溢倉七十間可貯

糧十七萬五千石 崇墉倉七十間可貯糧十七萬五千石 廣盈北倉十七  
間可貯糧十七萬五千石 廣盈南倉十七間可貯糧十七萬五千石 永備  
北倉八十間可貯糧二十萬石 永備南倉八十間可貯糧二十萬石 豐備  
倉五十間可貯糧十二萬五千石 恆足倉五十間可貯糧十二萬五千石  
既備倉五十間可貯糧十二萬五千石 足用倉五十間可貯糧十二萬五千  
石 大京倉六十間可貯糧十六萬二千五百石 豐積倉五十間可貯糧十  
二萬五千石 大稔倉七十間可貯糧十七萬五千石  
上都諸倉 體源倉正廩二座各五間柱高一丈六尺深四丈五尺長六丈五  
尺東廩二座各五間柱高一丈六尺深四丈五尺長六丈五尺 廣濟倉正廩  
一座十三間柱高一丈六尺深四丈五尺長一十六丈東廩二座各十間柱高  
一丈六尺深四丈五尺長十二丈西廩二座各十間柱高一丈六尺深四丈五

尺長一十二丈南廩二座各十間柱高一丈六尺深四丈五尺長一十二丈

萬盈倉正廩一座十三間高一丈六尺深四丈五尺長一十六丈西廩東廩南

廩

皆與廣濟倉原文同

太倉一座七間高一丈六尺深四丈五尺長六丈五尺

雲州

倉正廩二座各五間高一丈六尺深四丈五尺長六丈東廩二座各五間高一丈六尺深四丈五尺長六丈五尺西廩二座同東廩

宣德府倉 如京倉正廩二座各十間高一丈六尺深四丈五尺長六丈五尺

西廩一座十間高一丈六尺深四丈五尺長六丈五尺

御河倉 至元三年十一月十日省臣稟御河旁近每歲露積糧多損臣等議今歲於沿河築倉貯米上從之

各路倉 九年正月八日省劄隨路可以添蓋常平倉處所戶部議若於隨路添蓋雖官買木物必須役民卽日春初恐奪農務如已後豐稔故房不敷陸續



添蓋先將各路元有及可以續添開呈省照先奉旨添蓋倉廩仰各路總管府摘差正官及坐去造作人員催督起蓋每間約儲糧千石合用木物令人匠從實計料估直於各路見在官錢支買會計鐵數就於附近爐冶關造工匠先儘係官投下內差撥如不敷於軍民站赤諸色戶補差其夫役止令各諸路於本管旁近丁多之家借倩官爲日支鹽米所蓋倉廩須保管完固若近年但有損壞罪及元監造官仍以己資修葺 總計元有廩倉一千五百二十間 眞定等路一十四處七十九萬二千五戶一千四百間元有九百八十間今添四百二十間 眞定路四萬一千一百十五戶二百六十間元有二百間眞定府一百間冀州三十間中山府二十間趙州五十間今添六十間中山府二十間冀州二十間蠡州二十間 洛磁路四萬七千四百二戶倉廩七十間元有五十間洛州三十間磁州二十間今添洛州二十間 新德路四萬五百二戶

倉廩七十間元有五十間今添二十間 東平府四萬六千九百九十五戶倉廩七十間元有五十間今添二十間 博州路三萬二千七百三十二戶倉廩五十間元有三十間今添二十間 濟寧路四萬一千二百二十三戶倉廩九十間元有三十間今添六十間在城二十間兗州二十間單州二十間 曹州四萬二千四百七十二戶倉廩五十間元有三十間今添二十間 德州二萬五千四百九十一戶倉廩五十間元有三十間今添二十間 濮州三萬二千六百六十九戶倉廩五十間元有三十間今添二十間 順德路二萬八千七百三十三戶倉廩五十間元有三十間今添二十間 大名路八萬八千一百九十戶倉廩一百五十間元有一百間大名路三十間開州三十間舊縣二十間滑州二十間今添五十間大名三十間濬州二十間 河間路七萬九百六十一戶倉廩一百二十間元有一百間在城五十間長蘆三十間安陵二十間

今添二十間 順天路七萬四千三十四戶倉廩一百七十間元有一百五十間在城四十間祁州三十間易州三十間雄州三十間安州高陽二十間今添在城二十間 濟南路七萬九千四百一十五戶倉廩一百五十間元有一百間在城四十間清州縣六十間今添五十間在城二十間□州三十間 南陽等三處四百間元有二百四十間今添一百六十間 南陽府二萬九千五百九十二戶倉廩一百一十間元有六十間汝州二十間裕州二十間鄧州二十間今添五十間在城三十間唐州二十間 歸德府一萬四千三百九十戶倉廩一百二十間元有徐州三十間今添九十間在城三十間亳州二十間邳州二十間宿州二十間 南京路一十萬五千二百三十一戶倉廩二百七十間元有南京一百五十間鄭州三十間鈞州三十間許州三十間陳州二十間蔡州二十間睢州二十間今添二十間於陳州 太原等二路三百三十間元有

三百間今添三十間 太原路八萬九千七百一十一戶倉廩一百七十間元有一百五十間在城五十間醇州三十間汾州三十間嵐州三十間平定州十間今添二十間石州一十間堅州一十間 平陽路一十萬七千五百六戶倉廩一百六十間元有一百五十間在城五十間絳州三十間河中府三十間澤州一十間潞州一十間沁州一十間隰州一十間今添霍州一十間 中都等處廩蓋倉八十間中都路六十間檀州二十間涿州二十間霸州二十間冠州在城二十間

納蘭不剌倉二十六年十二月二十日丞相桑哥平章阿魯洋撒里等奏納蘭不剌建倉寧夏府糧船順流而下易於交卸忙安倉糧雖是沂流亦得其便迤北孔居烈裏火阿塞塔兒海裏鎮海等處住各軍人及和林送糧俱近進呈倉圖上從之

塔塔裏倉英宗皇帝至治元年河東宣慰司委官朔州知州荅里牙赤言荅荅裏諸屯田相視議擬各項事理就差荅里牙赤計稟中書有準下兵部移文樞府逐一具開于後

納憐倉見於屯田近南黃河北岸內有正教東西廡房二十一間緣其空閑已行呈索於空閑倉房週圍撥地三十畝作瞻倉地甚便委官議納憐平遠倉既近黃河口十里卽經行要衝屯田所種禾稼周其旁近上年屯軍所收子粒見貯本倉如蒙大同路委官與東勝雲內二州正官於年銷錢願夫買物修之撥付萬戶府貯糧較之移拆忙安倉所費十省其九公私俱便兵部議準所擬照會樞密院兵部依上施行

忙安倉去黃河頗遠運糧不便已別建新倉其舊倉今空閑如令河東宣慰司拆移前來貯糧使委官相視忙安舊倉二十一間牆壁倒塌木石俱全甃瓦三

損其二若移此倉則陸地相距屯田故城七百餘里可用車千餘約費腳直五千餘定至彼可須添補木瓦諸物亦不下五千餘定若黃河運載至忙安倉南三十里陸路纔至渡口拆流一千里約費萬餘定至納憐平遠倉復行十里入陸至舊新安州又七十里黃河殊無往來客舟雖有運官船每處不過三十五艘椽檁長短不等實難裝載況其地寒早易□必候下年方可興工修理況兼委有妨礙既納憐平遠倉已擬修理撥付屯田萬戶府忙安倉雖擬拆移不惟省費亦免勞民兵部議準擬屯田萬戶府倉廩廡宇本府與所委官那懷等議合於兀郎海山下舊新安州故城內建四向立屯爲便擬合用物料照會河東宣慰司早爲建造相視兀郎海山下舊新安州故城方圍七里並無人煙黃河沿路別無村疇西至寧夏路七百里若修上項公廩合用木植令寧夏計料收用買順流運至古城或於納憐平遠倉募夫匠建立誠便兵部議準擬省照以

舊新安州古城內建屯田萬戶府公廨不見閒座數目合用物料遂寢其事  
甘州倉仁宗皇帝延祐三年十一月五日甘肅行樞密院咨甘州倉言本倉牆  
壞恐損官糧乞添展修倉屋九十間已劄付甘州路修建八十五間就用看倉  
年六十人供作自三月爲始興工不見次第蓋供作軍少遂照元貞二年甘州  
建倉八十間啓奉朮白大王令旨於各翼摘軍五百人執役請依前數發遣庶  
得早完十月二十六日樞密院官塔失帖木兒等稟甘州修建倉屋需軍五百  
臣等議合於旁近漢軍內如數差調上從之

太宗皇帝五年癸巳詔前令隨處官司就差元設站夫修治運糧河道可疾遣  
站夫自備糧物速爲修治工軍放還專委運糧河所屬各州縣長提舉河道差  
能幹官吏及約糧差夫以時巡護不致賊盜滋生若遇失盜不以官私之物並  
勒提舉河道及巡護者賠償如元贓不獲依條斷罪如有河岸缺壞不分晝夜

多差丁夫併力修築違慢遲滯並以違制論仍仰沿河以南州府達魯花赤等官各於瀨岸州城置立河倉差官收納每歲稅石旋依限次運赴通州倉其立倉處差去人取 辛卯壬辰年元科州府每歲一石添帶一石并附餘者撥燕京令陳家奴田芝等用意催督一時漕運毋違慢其通州北起倉據見可收物處仰達魯花赤管民官備木植差夫令和伯撥泥匠三人木匠三人鐵匠一人速修及差守倉夫役三人半年交替如失盜就令均陪 至元九年六月二十一日中書工部奉省判斷事官幹脫兒赤等呈通州廣盈兩倉損壞令工部斟酌於鼠耗錢糧內就漕運司計料修補事送戶部議官倉損壞隨申上司修補用過物價申部除破似此早得完備省準送工部照常平倉省議隨路倉廩二一年之內損壞者釐勒監造以已資修補如遷轉事故本處官司年銷錢內隨卽修完將用過土物同元監造官職名申部根勾追還若二年之外損壞者官爲



修理工物價錢申部除破 十四年四月二日省筭河倉損壞於各路以官帑修補其二十餘所今秋雖已修畢如無人守護則近倉之民偷取輒木縱放頭匹踏踐倉場損壞牆壁宜令各處州縣官提調勒斗腳常川看守任滿相監交割赴漕運司給由工部議各處何倉損壞倉官隨卽移文本處官司一同相視會計工物於年銷錢糧內支用監督修完如二年內損壞監修官備工物修償壞在二年之外官自修葺倉官任滿所代官完備收付於解由內開寫省 二十四年四月十八日泉府卿阿散等稟大都諸倉屋今損壞省委麥朮丁往視河西務倉已修其餘續次興工從之 二十五年五月十三日丞相桑哥等奏上都倉俱在城外不便令議擬於城內建倉一二所上從之 二十七年九月八日平章帖木兒言武平路地震奉詔巡撫九月二日至彼應係官局院房舍盡皆積倒其糧物壓陷入地跑掘旣出無處藏貯擬於平灤路及興松州差工

匠一百二以修蓋省準令工部督責合屬施行 二十八年二月十五日丞相完澤等奏去歲地震倉室圯壞今議令忙古斛提調修葺上從之 三十年九月二十八日平章不灰木等奏疏關新河那懷督役公謹今已成功河西務通州倉儲糧最多俱如曠野東城紅門內近新河有隙地復遷紅門稍入五十餘廣展基址期數年閒盡建倉宇移致河西務通州糧甚便工部楊尙書言乞命那懷董工庶得早來上是之曰不必再慮盡力爲之 十一月二十九日平章刺眞阿里等稟楊尙書言今皇城東河沿建倉令漕舟於此交卸便奉旨準又奏常例和買蒿草以燒甃瓦供諸營繕今擬令刈葦俟河冰開舟運致以代蒿用奉旨不須和買大都民有十萬每戶賦納一車或一束命阿里掌之 成宗皇帝元貞元年正月六日平章刺眞等奏每歲倉蓋及諸營繕差軍刈葦以供用今歲營繕亦多議可仍舊用軍採刈 二月二十九日左丞相都刺等奏修

理倉庫官每歲令軍人助役前者移文樞密院取之未從今歲約用軍五千奉旨准

以上出永樂大典卷七千五百十一

元世祖至元六年始立常平倉其法豐年米賤官爲增價糶之歉年米貴官爲減價糶之於是八年以和糶糧及諸河倉所撥糧貯焉二二三年定鐵法又以

鐵課糶糧充焉

永樂大典七千五百七十七事當出此條永樂大典原題宋會要宋會要安得有元事

附倉庫官

倉氏庫氏之爲官其制已久國家於常調之選轉補之吏歷倉庫之任視其錢穀之多寡地理之遠近爲之減資陞轉之法焉非徒錄其煩勞抑出納之吝使之知所勸也若資歷由雜職止於雜職用焉

至元二十九年五月吏部言選注到倉官三十三員內有告稱不願并不到人

數再令吏部選補數足卻有品級爭懸人員今蒙省議在都并通州河西務直沽李二寺等處倉官比之其餘倉庫尤爲難重今選注上項倉官於應得資品上例陞一等如本界任滿交割明白別無侵欺短少粘帶過犯給到元備解由者再陞一等遷敘先儘到選相應見在人員不敷聽於各衙門有出身一考之上令譯史知印宣使稟差內選用如有推避之人依條治罪若選注不當耽誤收支糧料罪及當該銓選官吏送吏部照會仍分揀見注人員通行選注 元貞元年九月吏部前言李二寺倉監支納馬世榮倉副張煖等告任內總收糧一萬一千四百八十石三斗五升三合五抄八撮節次支交畫絕除依例准除合得破耗外積餘耗糧一千一百七十八石五斗五升七合二勺七抄一撮本部照得大都裏外倉官除至元二十九年五月已後除授人員已有陞等定例所據至元二十四年閏二月初七日已後至元二十九年五月例前在都河西

務通州李二寺直沽等倉官任內所收糧料多寡不同爲此再議各官任內所收糧斛若有積餘一千石以上者比依倉官李瑞等例再陞一等一千石之下至五百石之上者任迴減一資歷陞轉省准 吏部呈本年五月分從七以下官員數內倉官趙輝李從慶賈議等三員擬陞二等歷過倉官月日後任通理銓注各各窠闕省議趙輝等既選充倉官例陞二等所歷月日不須理算本部參詳今後似此人員擬合一體施行省准 二年六月御史臺呈各處倉官人等有收糧多者四十餘萬少者不滿二萬例陞二等看詳收糧多者倘因照略不及失陷短少利害非輕任滿別無侵欺理宜陞用其餘收糧數少倉官一例陞等中間優劣不偏中書省下吏部斟酌各倉優劣擬到陞加等第今後倉官有關於到選相應職并諸衙門有出身令譯史通事知印宣使稟差兩考之上人內選用依驗難易收糧多寡陞等任迴於應去地方遷敘通州河西務李二

寺等倉官於應得資品上一等任滿交割別無短少減一資通理 通州七倉  
足食 有年 及秭 富有 盈止 樂歲 廣儲 河西務七倉 大盈  
崇墉 永備南 永備北 充溢 廣盈南 李二寺 直沽在都并城外  
倉分收糧五萬石之上倉官於應得資品上陞一等任滿交割別無短少依例  
遷敘 永平 既積 廣衍 惟億 永濟 盈衍 豐實 順濟 既盈  
萬斯南 萬斯北 收糧一萬之上倉官止依應得品級除授任滿交割別無  
短少減一資通理 豐閏 大積 通濟 千斯 廣貯 相用 廣濟 大  
德三年六月吏部言倉官例所設正官例合陞等減資周歲交代緣各官禮任  
月日不等同時齊界一例交換所歷多寡不同若使照依呈准胡伯元一體陞  
轉中間似爲不倫參詳倉官各界得失所收糧斛別無短少應陞等者擬歷過  
七月以上照依元除陞轉六月以下擬減一資應減資者六月以上照依元除

優減五月以下止理歷過月日省議陞等准所擬減資六月以上照依元除優減五月以下擬減一十五月 大德四年八月上都留守司關上都廣濟萬盈永豐三倉攢典劉聚等未定出身吏部議上都所設萬盈廣積二倉俱係正六品永豐倉係七品比之大都平准行用庫品級尤高又係酷寒之地今擬各倉攢典轉寺監本把并萬億庫司吏相應省准 戶部言上都東西萬盈廣積二倉所設倉官二周歲爲滿司倉一周歲爲滿不能齊界似爲未便吏部議宜依 戶部擬司倉與倉官一禮二周歲爲滿省准 四年九月戶部言直沽倉厥海糧到來稍水與都漕運司等處對船交裝直沽倉止是畫會作數而已不出月餘交卸既畢在倉無糧可守任滿與通州等倉官人等一體陞轉似涉太優依准吏部言既比各倉所掌優輕難循一體遷用今後倉官比依通濟等倉例不須陞等任滿交割別無短少粘帶過犯擬減一資陞轉外據見設司倉一十名

亦合量減五名如准吏部擬相應省議既別無親臨收支糧斛存設大使一員攢典二名司倉二名斗腳五名其餘人員並行革去餘准所擬五年戶部員外郎趙章訓言前往通州李二寺河西務等處體知倉官司倉並不同時禮任所收糧斛不下二十餘萬石見設官三員先到任者始於前界官處一一交盤見數待同界官員立界收支其同任官員或三五月或半年之上方纔到任及司倉人等到倉必須重複交量不唯交量生受抑且短少糧斛又都漕運司申在都省倉三月一日齊界交割據本司所管倉分如亦三月一日齊界實慮倉官短少卒不敷用又兼此時正是河倉攢運糧斛轉到舊糧未嘗攢動誠恐相妨合依已擬自下年爲始六月一日齊界交割其六月一日河糧已畢上年見在攢運赴都新運海糧未到乘此空隙各不相妨公務兩便部議如准本司所擬自下年爲始六月一日齊集交割爲宜又議若擬司倉與倉官俱各齊界除



在都司倉六十七名三月一日先行逐旋發補其河倉總用司倉一百一十一名俱於各路年終得代院務官內勾所如今隨卽起解到都聽候至六月一日關發中間或有病故者或有避懼在逃者必再催督各人居止去處地理遠近不同倉卒不能齊集其司倉止是聽受倉官支使分辦之職節續開發收受糧斛事不相妨參詳除倉官依准戶部所擬六月一日齊界外據司倉依舊逐旋發補交換相應有准 五月省議和林宣慰司所轄倉庫除廣濟庫官別行銓注稱海札渾也迭別縣不□常川收糧倉分如和林昔寶赤八刺哈孫孔古烈倉收支糧斛浩大又係緊急支持去處擬將上項諸倉改立從五品提舉司各設官三員提舉一員從五品同提舉一員從六品副提舉一員從七品周歲爲滿於列選人內選充應得資品上擬陞二等任迴別無粘帶過犯照依元除地方選用所歷月日通理任內所收糧斛若有短少依條追陪黜降 五月甘肅

行省言本省極邊重地供給諸王屯駐大軍規措糧儲浩大照得腹裏行省倉官受勅牒常調遷轉唯甘肅倉庫官多任色目之人不知官事利害止是本省差設比年以來錢糧失陷連綿追理不能杜絕今後合依腹裏倉官例於常選相應人內銓注省擬甘肅二路每處設官三員監支納一員正六品倉使一員從六品倉副一員正七品二周歲爲滿於列選人內銓注入倉先陞一等任滿交割糧斛別無短少粘帶過犯陞一等照依元除地方遷用若有短少依條追賠黜降 六月御史臺言江容楊春俱歷提控案牘三十月未應入流既充倉官例陞一等止該正九品級今注倉官係八品窠闕任迴理從八月日添一資歷陞轉事屬違錯部議江容楊春俱係提控案牘一任依例合於提控案牘藉記既已選充倉官例合陞等比依成梓例任迴理算正九月日如准所擬今後似此人員依上例銓注省准 大德七年十月吏部呈議注到大同倉官忙兀

魯不花等一十四員都省議倉官依准部議二周歲交代除納蘭不刺永豐倉係迤北酷寒地面例陞一等其餘六倉糴中賣之糧隨時出納難議一體定奪若任迴別無短少粘帶減一資陞轉 八年七月湖廣省咨□陽府言每歲出納錢糧浩大所設倉庫官止於各路司吏內選用本府雖爲散府緣直隸行省若於本府請俸司吏內選充滿日依例求敘本省議散府司吏請俸六月之上選充本府倉庫一界滿日年四十五以上與吏目未及者務使七十月之上至九十月選充一界者年四十五之上與都目未及者院務提領內任用吏部議湖廣行省所轄散府司吏充倉官合依河南行省散府司吏充倉官比總管府司吏所充者降等定奪省准 大德十年四月吏部言伏見京畿并都漕運司所轄倉分見設司倉人等作弊不便蓋百司得人則治非人則廢況倉官之職所任繁重所難其人多於有過人內選取殆非常法如歷錢穀人員所犯欺

詐情罪若復置之此地適足以長奸滋惡爲弊尤深牧民之犯贓者亦可以迴避此職今須以無過之人遷充使其人各知錢穀爲國之重亦足以有所懲勸且每歲銓注倉官願入狀者不能盡用今歲倉官自願十無一二俱於列選人員內提注足見各倉事體雖以用人爲本然法弊則不能不變事關錢穀宜從戶部照勘議擬省准 六月河南省咨所轄去處除汴梁歸德等腹裏六路倉官庫子攢典照依大德四年咨准定例差設外據淮東淮西荆湖兩道宣慰司所轄路分并蘄黃二路擬合一體已經筭付各於大德十年正月爲始於州司吏內勾補周歲滿日別無粘帶過犯於路府司吏內委用庫子攢典於縣司吏內勾補周歲滿日別無粘帶過犯轉補州吏無州路分所管縣分上倉司吏內選差依上轉補違例委用者雖有役過月日並不准算除已筭付淮東淮西荆湖兩宣慰司並蘄黃二路依上行之省准

### 倉庫官陞轉例

至大三年三月尙書省判吏部照先奉中書省筭付通州河西務等倉六月一日齊界交代在都倉官三月一日齊界交代又元貞二年六月奉省筭通州河西務等倉每歲所收糧斛不下二十餘萬擬陞一等任迴交割別無短少減一資歷陞轉在都京倉每歲所收糧斛五萬石之上擬陞一等 大德三年六月 中書省筭倉所設正官例合陞等減資周歲交代緣各倉官禮任月日不等同例齊界一例交換所歷多寡不同倉官齊界得代所收糧斛別無短少應陞等者七月以上依元除陞轉六月以下擬減一資近於至大二年九月內省議通州河西務在都京倉官從新銓注已於是年十月初二日禮任將見任者俱各截替部議除在京倉官已歷七月之上照依舊例陞轉其通州河西務倉官俱係陞等減資人員自至大二年六月之任至十月一例齊界截替上歷五月若

比例不陞卻緣各官卽非病故終是截替又兼已經陞等雖議面降若交割別無短少照依已除陞轉擬不減資似爲便益有准 四年九月戶部言據萬盈廣積兩倉申伏念國家治民之本禮樂爲先育實之源錢糧爲重竊見本倉官員俱係常選所發自至大二年十月蒙尙書省遷充前職至大三年正月齊界之任經今半年之久所收糧斛倉廩盈滿竊恐經年燒折發變倘有失陷釐勒追賠輕則斷罪重則破產由此論之不爲不重又緣出身通例擬二周歲爲滿交代別無短少止陞一等不理月日禾林倉官二年爲滿例陞二等所歷月日又同初任通理大都京倉官員自三月一日齊界禮任通州河西務倉六月一日齊界之任俱於七品以下流官并各衙門兩考令譯史宣使人員許願入狀然後銓注周歲爲滿入倉陞一等任迴又減一資通理月日及豐實倉每歲收支糧斛不滿三萬依前陞轉減資竊緣上都萬盈廣積兩倉北連沙漠地接禾

林迺邊遠酷寒之地周歲出納少者不下三四十萬餘石比之大都倉分所收糧斛爭懸數倍實是優劣不同如蒙照依禾林倉例陞二等唯復比依大都京河二倉一體陞等減資不爲偏負本部照擬大都京倉各收糧斛數少周歲爲滿例陞一等惟上都乃酷寒之地廣積萬盈兩倉每歲出納糧斛三四十萬萬石不爲不重惟見任倉官又皆流官常選卽非畱守司用保人員及二年爲滿上陞一等不惟優劣不同又使無以激勸上都兩倉合依大都京倉之例周年爲滿別無粘帶短少陞等減資似不偏負中書省下吏部議各處倉官陞轉通例行之已久今上都兩倉雖與所指倉分各掌事體不同緣係酷寒之地量擬照依舊例二周歲爲滿交割無虧使無過犯於應得資品上陞一等歷過月日今復比例通理省准 皇慶二年正月河東山西道宣慰司言近爲屯儲府所轄通濟等四倉急闕收受子粒倉官本府所轄迤北淨水等三倉俱係上司遷

到常調流官今據南屯四倉照依迤北三倉例銓注常調人員唯復於本道解  
由到司錢穀官內就選依例通理月日或候秋成於大同等處屯儲軍民總管  
萬戶府見役屯官屯長內不妨本役輪番差撥收受周歲交替官民長便本部  
照議南屯倉官若於長選人內選差南陽浩澤芍陂等屯別不曾別設倉官又  
淨水等三倉所受糧斛均係有司乘賤和糴亦與上項倉分不同如准本道宣  
慰司所擬每歲秋成從本司於大同屯儲軍民總管府見役屯官屯長內摘撥  
收受下年相沿交代庶革擾民之弊省准 延祐四年四月江浙行省咨各路  
司吏歷俸已及兩考在後選充五萬石之上倉官一界如無侵欺粘帶合無將  
歷過倉官月日比路吏一倍折算歷五萬石之下倉官月日以二折三考元設  
路吏俸月通理九十月照依見俸遞降通例典史一考陞轉惟復五萬石之上  
者比同考滿路吏出身充典史一考陞吏目五萬石之下者於典史內添一考



依章遷敘庶幾勞逸均平人不避難部議今依江浙行省所言各路見役司吏已及兩考選充倉官五萬石之上者如無侵欺粘帶比同考滿出身充典史一考陞吏目五萬石之下者於典史添一考依例遷敘爲宜省准 八月十四日湖廣省言常德路易鼎先充潭州路司吏五十一月大德九年補倉官一界遷充常德司吏通理九十月今次奉到吏道出身新例不見所歷倉官可否准理又興國路申路府倉庫官俱於本衙門見役司吏內所用掌管出納錢穀責任之重無可養廉出納之際稍若所要事發依例斷黜今止理實歷月日已是偏負部議湖廣行省倉官既於見役請俸路吏內選充宜從江浙行省元擬如係路史歷俸已及兩考充倉官一界別無侵欺粘帶准同考滿出身充典史一考陞吏目遷敘庫官周歲如無粘帶准理本等月日考滿依例陞轉相應省准

以上出永樂大典卷七千五百十七

右元經世大典工典中倉庫一目萍鄉文道希學士廷式從永樂大典中鈔出以敍錄校之除茶鹽局事未載外餘殆完具矣倉庫官以下當在治典錢穀官中以與倉庫事相關且卷帙無多故合爲一編云丁巳六月海寧王國維



大元海運記卷之上

惟我世祖皇帝至元十二年既平宋始運江南糧以河運弗便至元十九年用丞相伯顏言初通海道漕運抵直沽以達京城立運糧萬戶府三以南人朱清張瑄羅璧爲之初歲運四萬餘石後累增及二百萬石今增至三百餘萬石然春夏分二運至舟行風信有時自浙西不旬日而達於京師內外官府大小吏士至於細民無不仰給於此於戲世祖之德淮安王之功逮今五十餘年裕民之澤曷窮極焉

世祖皇帝至元十九年初命上海總管羅璧張瑄朱清造海船六十艘募水工同官軍自海道漕運江南糧四萬六千餘石明年三月至直沽從丞相伯顏所言也伯顏丞相奉旨取宋既得江南而淮東之地猶爲宋守乃令張瑄朱清等

自崇明州募船裝載亡宋庫藏圖籍貨物經涉海道運入京師又命造鼓兒船運浙西糧涉江入淮由黃河逆水至中灤旱站般至淇門入御河接運赴都次後扞開濟州泗河自淮至新開河由大清河至利津河入海接運因海口沙壅又從東阿旱站運至臨清入御河及扞開膠萊河道通海僂運至元十九年太傅丞相伯顏見裏河之僂運糧斛前後勞費不貲而未見成效追思至元十二年海中般運亡宋庫藏圖籍物貨之道奏命江淮行省限六十日造平底海船六十隻聽候調用於是行省委上海總管羅璧張瑄朱清等依限打造當年八月有旨今海道運糧至揚州羅璧等就用官船軍人仍令有司召顧梢碇水手裝載官糧四萬六千餘石尋求海道水路扞行海洋沿山求曠行使爲開洋風汛失時當年不能抵岸在山東劉家島壓冬至二十年三月經由登州放萊州洋方到直沽因內河淺澁就於直沽交卸

十九年十二月立京畿江淮都漕運司二漕運江南糧仍各置分司催督綱運以運糧多寡爲運官殿最中書省契勘南北糧餉國之大計前雖曾僭運虛費財力終無成功蓋措置乖方用人不當以致如是今大都漕運司止管淇門運至通州河西務其中灤至淇門通州河西務至大都陸運車站別設提舉司不隸漕運司管領揚州漕運司止管江南運至瓜州至中灤水路綱運副之押運人員不隸漕運司管領南北相去數千里中間氣力斷絕不相接濟所以糧道遲滯官物虧陷失誤支持所係非淺比以省臣奏奉旨京畿江淮設立都漕運司二舊官盡行革去其江淮漕運司除江南運至瓜州依舊管領外將漕運司官一半於瓜州置司一半於中灤荆山上下行司專以催督綱運每歲須要運糧二百萬石到於中灤取京畿漕運司通關收附中呈揚州行省爲照京畿漕運司自中灤運至大都仍將中灤至淇門河西務至大都車站撥隸本司管領

其漕運司官一半於大都置司一半於中灤淇門上下行司專以催督綱運每歲須要運糧二百萬石到都取省倉足數抄憑申呈戶部爲照每歲十二月終省部考較運及額數者爲最不及額數者爲殿當該運司一最陞一等三歲任滿別行遷轉一殿降一等次年又殿則黜之都省移咨揚州行省欽依施行二十年六月王積翁議開挑河道漕運江南糧右丞麥朮丁等奏王積翁言亡宋都南京時每年運糧六百萬石如今江南糧多若運至京師米價自賤以其說奏有旨命臣等議蓋運糧之事惟廣輸運之途今止是中灤一處漕運儘力一年惟可運三十萬石近者阿八赤新開一河又前奏准令奧魯赤經由濟州開挑一河又黃河迤上有沁河可以開挑一河遣人相視具見畫圖今脫忽思進呈如此等河道一一成就則所運糧數自多上曰朕覽圖宜如卿所奏是年八月以去歲初試海運暨諸河運總計所至者糧二十八萬石丞相火魯火

孫參議禿魯花等奏去年伯顏曾言海道運糧火魯火孫省官令試驗今日揚州以船一百四十六運糧五萬石四萬六千石已到其餘六船尙未到必是遭風來者又言此海道初行多不曉會沿海來去紆繞遼遠今海中間有徑直之道乞遣人試驗又奏阿八赤新所開河道二萬石有餘糧又東平府南奧魯赤新修河道三萬二千石糧過濟州內五千餘石暨御河常川僂運河道糧總二十八萬石俱已到餘糧逐次將至奏旨稱善 是年十月禁運糧軍人及綱運船戶擾民不便條制中書省准御史臺呈江北淮東道提刑按察司言切見漕運司運糧軍人并綱運人戶牽駕糧船於揚州淮安運河要路故意阻塞河道將腳板兩邊探出不通客旅往來間有客船欲於糧船兩邊經過或是船梢誤衝探出腳道板或客船桅篷高低牽繩長短誤相牽挽不曾挽動分毫浮動物件運糧軍人分布用篙將客船撈打或將客船篙棹蘆席桅繩等物搶奪但去



遮護便將客人行打及於兩岸居住村坊店舍人家處取要酒食強打豬雞但有推阻眾人便將百姓毆打百端騷擾爲此令淮安漕運分司講究得運糧軍人俱係江北兩淮撥到漢軍并新附軍人諸翼輳集撥成一運俱有管軍千戶總把百戶人員管領押運時暫漕運司勾當并和顧運糧船戶亦係諸路顧到已有差定押綱官員但遇散軍或船戶擾動行船客旅及岸上居民除將散軍船戶對證是實取訖招伏痛行斷罪外將押運正官取勒約束不嚴招伏斷罪似望易除民害本司參詳如准淮安漕運分司所言事理禁治實與民除害若不嚴行禁約切恐當路人民不能居止道路蕭條深爲不便除已移牒江淮都漕運司遍歷經行漕運分司去處榜諭依上禁約外本臺參詳行御史臺咨到約束運糧軍人并船戶不得阻塞道路擾民事理是爲允當又擬本臺呈山東東西道提刑按察司言照得本司於至元二十一年月日不等十次寧海州并

淄萊路牒呈海州運糧過往行船梢水蠻軍計一十五起動經聚眾百十餘人各持兵刃劫掠良民打奪財物及將所運官糧自相般奪等事除已行下合屬行移捉賊外本司切詳山東瀕海地面土廣人稀地形險惡未曾收復亡宋時其瀕海去處在前有東路蒙古漢軍都元帥也速解兒管領軍馬行營種田并有守把海口壯丁軍人屯駐以備不虞削平亡宋之後前項軍民遷南卽今前項海道與迤南諸蠻相通其間遞軍貢物過往行船梢水軍人不時聚眾下船侵害良民劫掠人口財物卽便上船開洋去訖陸路不能跟捉又巡防弓兵數少難以禦備兼瀕海去處田野寬廣合無量移軍人置立屯田以備不虞實爲長便於至元二十一年十二月十七日本臺官大夫玉速帖木兒中丞阿剌帖木兒崔彧侍御禿剌帖木兒啓海道運糧軍人來往經過海邊郡邑居民多被騷擾今與省院官一同商量如何鎮壓從便舉行啓奉皇太子令旨允其所請

送戶部就與刑部一同講究得如准臺呈似爲便當所有運官押綱官用心約束軍人船戶不致擾民者緣係職分當然難議優賞外據量移軍人於瀕海去處置立屯田鎮壓事理合從樞密院定奪都省准擬移咨江淮等處行中書省及下戶部行下合屬依上禁治筭副御史臺照會去訖軍船短般前來淮合路交割綱運自江南呂城軍船運至瓜州一節令江淮都轉運使司別無約束外據瓜州運至淮安路短般糧船係是隨路撥到漢軍新附軍人使駕官船往來般運今議得自瓜州裝起重船三運兩運三四運前後相序行程專差奏差一員乘坐站船往來催督及監視有無擾民之事每運頭船并末尾船上各插白旂一面書寫運官姓氏庶望被擾人民易認是何運次運官既立名旂亦懼連累知所警戒瓜州總司先取奏差人等須管往來催督運糧疾早到來淮安不致遲滯及監視運官約束軍人毋得阻塞河道如遇客船兩相趨過不致阻當

客旅行程及不致軍人毆打客船搶奪諸物不得於岸上村坊店舍百姓之家取要酒食強打豬雞毆擊良民如但有違犯軍人差來奏差親見者奏差隨卽約會運官卽將擾民軍人捉拏痛行斷訖別取運官鈐束不嚴招伏先行入遞申來淮安分司如運官私下不伏招取仰奏差人具由申來奏差前後催綱如不親見擾民者但有客船或到村坊店舍須管詢問百姓如但曾擾民者奏差等抄寫百姓某人被那軍人或奪訖物件或取訖酒食或打訖豬雞或打傷某人卽令百姓當地官司呈告申覆本官上司移關淮安分司奏差隨時前來運官處說知挨問擾民軍人隨時依例斷罪如運官不肯依例斷治仰奏差一一申呈淮安分司等候糧運到來淮安隨時挨舉除運官已將擾民軍人船戶痛行斷治約束不嚴招伏隨時依例斷治外據奏差察知或各路官司移文前來擾民事將擾民人鎖索監收回到擾民處所對證是實量情斷罪訖仰奏差

人等備細申覆瓜州總司等候把總運官并各翼軍官到於瓜州取勒運官并各翼官約束不嚴縱令軍人擾民不行究治招伏依例斷遣施行如綱運到來並無申到擾民公事取要奏差運官重甘執結以後卻有事發擾民者依下項條款斷罪今約量定到各罪名於後 受宣官員若親自部領軍人擾民者或所轄軍人因毆傷致人命者此二項但犯罷職如鈐束不嚴致令軍人擾民者雖將軍人嚴行斷訖本官取訖招伏初犯笞七下再犯一十七下三犯呈省定罪如親見軍人擾民不爲斷治者與部領軍人擾民同如約束不嚴縱令軍人擾民不爲用心體究不行斷治或因事發露者初犯笞一十七再犯二十七三犯呈省別議 受勅官員若親自部領軍人擾民者或所管軍人因毆傷人命者此二項但犯罷職如鈐束軍人不嚴致令軍人擾民者或縱令軍人擾民者不爲用心體究不行究治或因事發露比受宣官員凡罪加一等 受省院劄

付帥府諸衙門劄付官員若親自部領軍人擾民者或因毆傷人命者此二項但犯罷職如鈐束軍人船戶不嚴致令擾民者并縱令擾民者不爲斷治或因事發露比受勅官員凡罪加一等 本司奏差但有軍人擾民不爲用心體究因事發露者除軍人軍官依例斷罪外據奏差人等初犯二十七再犯三十七三犯罷去知而不舉或看覷面情受錢物酒食不舉者量其取受輕重斷罪追錢並行罷去 淮安路卸訖空船回去時淮安分司先取訖運官不致違犯執結亦差奏差一名取不致看循須管盡心執結乘坐站船隨船催督疾早到瓜州復運及監視運官鈐束軍人亦如重船一體行事但有違犯並令瓜州總司斷遣

和顧民船長運直到中灤并利津交割綱運

瓜州裝起中灤濟州長運綱船俱係和顧民船三綱兩綱或三四綱船亦差奏

差一員乘坐站船前後往來催督綱運監視押綱官鈐束綱頭船戶依前例取  
訖押綱官鈐束船戶不致擾民執結及取訖奏差重甘執結到來淮安分司隨  
時檢舉如有違犯將押綱官取招斷罪如是親見船戶擾民不行約束者與自  
擾民同及船戶毆傷百姓因傷致命或毆死者但犯罷職如遇河道淺澁去處  
若有賚奉都省行省明文許令各處添力盤剝牽拽者押綱官親賚省府文字  
更行移當地官司取索與本處官司一同斟酌可用車牛或船隻人夫盤剝者  
如當地官不行著緊應付雖應付不及用度者押綱官卽申附近漕運司照依  
奉到都省筭付取本路首領官縣達魯花赤已下官員招伏就便的決無得多  
餘取要車船人夫亦不得經直拖拽車人船隻如押綱官不經由當地官司徑  
直拖拽民夫車船者或無賚執省府許令應付車船人夫文字不得騷擾官司  
取要如無文字取要人夫拖拽車船者此二項與親領船戶擾民同或多餘取

要氣力者與約束軍人不嚴致令擾民同如約束不嚴致令船戶擾民者凡犯並與上項受省劄諸衙門文字軍官同罪奏差約束亦同上例淮安分司開闢將重船放入淮河分爲中灤濟州兩路隨卽差奏差二員各隨本綱催督前去中灤糧船淮安分司催到臨濠府已上係荆山分司各管催督自淮安臨濠府沿路但有擾民事理仰奏差人等並申荆山分司等候糧船到彼依上斷治奏差到臨濠府回來還司如但有不用心體究或受錢物酒食買告不舉者隨處官司行移淮安分司一例斷遣施行 荆山分司交割得上項糧綱亦差奏差一員乘坐站船催督前去及監視押綱官鈐束軍人毋令騷擾百姓直到杞縣中間如有違犯卽與上項短船軍人罪同奏差等直申中灤行司候綱船到中灤時行司依上斷遣如有爭差不伏行移取發元委奏差前去對證依上施行 杞縣上流係中灤行司差委奏差催督綱船監視押綱官鈐束船戶無令



騷擾百姓如有違犯直到中灤行司斷遣 中灤回綱空船三五運差奏差一員押回直到荆山交割荆山差人直到淮安分司交割淮安差人直赴瓜州交割如有擾民依例各處斷治 濟州利津糧船淮安分司差委奏差一員催督監押綱官鈐束綱頭船戶直到濟州漕運司交割中間但有擾民者仰奏差申覆濟州漕運司依上斷遣 利津回來空船利津分司差人押來濟州交割濟州差人押來淮安交割淮安分司差人前去瓜州交割如有擾民隨處依上斷遣 濟州漕運司交割到上項糧綱別差奏差催督監視仰綱官前去利津縣行司交割中間但有擾民者申覆利津行司依上斷遣 議得合於應干糧船經行河道兩岸但有三家五家村店照依此條令瓜州漕運司盡行出榜曉諭百姓并軍人船戶通知及行移瀕河州郡如遇糧船到界更爲差官巡視 議得運官押綱官年終考較如有用心押束軍人船戶不曾擾民者合無量加優

賞 是年十一月以海運可行議罷阿八赤新開河道丞相火魯火孫等奏阿八赤新挑河道迤南用船一百九十四隻運糧四萬八千九百六十一石其船一百四隻內損壞訖糧五千五十一石外船九十隻該糧二萬三千九百九石凡糧之到者與已損者其數以聞有旨以問阿八赤阿八赤言比前者揚州所運其船不堅又沿海邊而行故多損壞非預臣事臣所將船五十纔失其四其餘當以風信未至耳省臣言阿八赤新開河口候潮以入所損甚多民亦苦之今欲造小船五百隻建倉三處上曰伯顏運糧之道與阿八赤所開河相通否對曰不通也阿八赤之言非實今春試行海道其船一百四十八皆已至矣其不至者七舟而已前有旨以其事囑忙兀剌今忙兀剌使來言今用此道運糧爲船二百七十所失者十有九舟今皆得之矣上曰果如是阿八赤不必用忙兀剌好人也俟其來使遵所用海道以行阿八赤新挑河可勿用 是年十二

月以朱清爲中萬戶易金符爲虎符張瑄爲千戶仍佩金符以忙兀斛爲一府達魯花赤餘一府以萬戶之無軍有牌者除充丞相伯顏平章札散右丞麥朮丁等奏海運之事兩南人言朝廷若支腳錢請用己力歲各運糧十萬石至京師乞與職名臣等議朱清元有金牌今授中萬戶換虎符張招討之子見帶銀牌換金牌爲千戶忙兀斛見帶虎符今爲一府達魯花赤餘一府以萬戶之無軍而帶虎符者爲達魯花赤上從之

二十一年二月罷阿八赤河道以其軍人水手及船分與揚州平瀨兩處運糧右丞麥朮丁等奏幹奴魯忙兀斛三次文書言阿八赤新挑河道損多益少漕運勿濟其水手軍人等二萬船千艘俱閑不用乞付臣等歲運糧一百萬石臣等前奉旨與忙兀斛議用海道今已送糧回訖又朱清等各願送糧十萬又囊家斛孫萬戶請得此船與軍以充海運臣與伯顏丞相等議以阿八赤河道所

有水手五千軍五千船一千付揚州省教習水手運糧餘軍五千水手五千就駕平灤船從利津海道運糧上從之罷阿八赤所開河 是年十一月約束運糧回船軍人不使擾民都省據臺呈爲約束運糧軍人船戶梢水擾民事理送戶部與刑部一同講究准臺呈禁治運糧船隻總押送官到河西務等處下卸糧斛畢往往赴都求仕別無理會勾當卻令梢水人等不成宗伴縱意崎零迴還因而伺隙作過今後交割糧斛畢卻將應管船隻令已押糧官總行押運迴還遇夜聚集一處停纜鈴束梢水不致下岸似望易爲關防 每宗糧船各用顏色標記及大字書寫押運官職名容易辨認 如遇下船般柴取水摘委有職官員新行管押梢水人等下岸事畢押還似望不致違犯 令押運官拘收禁梢水人等船上夾帶隱藏槍刀弓箭

二十二年二月以濟州運糧船數闕命三省續造三千艘參政不魯迷失海牙

等奏自江南每歲運糧一百萬石從海道來者十萬石阿八赤樂實二人新挑河道運者六十萬石濟州奧魯赤所挑河道運者三十萬石今闕爾敦等言濟州河道缺少船隻臣等議令三省造船三千艘准奏 是年七月支運糧梢水口糧省准戶部呈利津海道萬戶府自江淮省起遣到新附梢水二千名合照運糧梢水例每名月支粳米四斗行下濟州漕運司放支

二十三年二月以征日本所造船給海邊民戶運糧平章阿必失哈參政禿魯花等奏忙兀解言修造征日本國船已完去歲無人看守有浍爛者令阿八赤忙兀解同議分付海邊民戶運糧上是之 是年十一月海運船壞棄米者運官償之人船俱溺者免所陪糧於下年帶運平章薛徹干等奏海運糧四年凡一百一萬石至京師者八十四萬石不至者一十七萬石運者言江南斗小至此斗大以此折耗者有之又以船壞恐其沈溺因棄其米者有之固當賠償其

人船俱沒者不知合賠否上曰沒於水何可使之賠又奏其合賠者差好人與忙兀斛等一同教賠與明年糧一處運米上從之

二十四年立行泉府司專領海運增置萬戶府二總爲四萬戶府都漕運海船上萬戶府亦速爲頭與張文龍等勾當平江等處運糧萬戶府忙兀斛爲頭與費拱辰張文彪等勾當孛蘭奚等海道運糧萬戶府與張武等勾當徹都等海道運糧萬戶府與朱虎等勾當二十四年正月始罷東平河運糧平章薛徹干等奏自江南海道經由東平新開河道所運糧船往來艱辛官未得濟乞罷之制可

二十五年增海運糧一百萬石丞相桑哥平章帖木兒阿魯渾徹里等奏往者奏奉旨每歲運江南糧一百萬石在後未足其數止運七十萬石今養濟百姓食用糧數多宜增運一百萬石制可是年二月內外分置漕運司二丞相桑

哥等奏以漕運糧斛舊設運司一兼管內外欺詐者多亦稽誤公事比奉旨分置漕運司二在內者爲京畿都漕運使司在外者爲都漕運使司內欽奉旨命者一十一員祇受勅牒者七員從之 是年十月內外漕運分掌稅糧房照得兩分司掌事務 京畿都漕運使司於河西務置司自濟州東阿爲頭并御河上下直至直沽河西務李二寺通州壩河等處水陸趨運接運海道糧斛及各倉收支一切公事並隸本司管領 京畿都漕運使司站車赴各馬頭倉般運糧斛仰本司先將半印勘合支簿開發都漕運使司收管然後押印勘合關文開坐所運糧數分付押運官賚擎前去都漕運使司投下比對元發半印號簿相同都漕運使司亦同勘合下倉支撥交裝毋致刁蹬停滯就取押運官明白收管隨卽具交裝訖糧數行移京畿都漕運使司照會行下省倉依數收受仍釐勒押運官須要小心關防車戶般運交納如有短少隨卽追賠數足及取押

運官招伏治罪每十日一次各司具實交裝并到倉收訖數日申部呈省 都漕運使司凡支糧斛并船人糧馬料須要依例置立勘合號簿明白書填押印勘合文貼下倉放支非奉省部許准明文毋得擅自動支 京畿都漕運使司應管各倉分收支見在并趨運糧斛旬申月數目及應覷各倉挑倒糧斛關防事理仰戶部照例行下本司須要依例申部呈省仍令各倉每月一次結轉赤歷呈押毋致作弊違錯 若有該載不盡事理仰都漕運使從長講究申部擬定呈省

二十七年十月賜海漕運糧官毳衣段各一丞相桑哥等奏自江南海運來者薛徹秃孛蘭奚朱張萬戶等萬戶及千戶百戶今歲多用心力乞每人賜衣一領上曰南人愛毳段各賜毳段一端令還

二十八年八月罷泉府司所隸運糧二萬戶府從朱清張瑄所請也平章不忽



尤等奏海道運糧朱清張瑄萬戶言往歲運糧止以臣等二萬戶府自去年隸  
泉府司沙不丁再添二府運糧百姓艱辛所有折耗俱責臣等乞見憐宜罷二  
府或委他人上曰彼所言是止令二府運之又奏朱張二萬戶言或有疑臣等  
者乞畱臣等在此令臣之子代運上曰安用如此言止以朱張二人運之是月  
併海道都漕運爲二萬戶府張瑄以驃騎衛上將軍淮東道宣慰使兼領海道  
都漕運萬戶府事朱清以驃騎上將軍江東道宣慰使兼領海道都漕運萬戶  
府事中書省奏准合併設立海道都漕運萬戶府二處 一海道都漕運都達  
魯花赤萬戶府係驃騎衛上將軍淮東道宣慰使兼領海道都漕運萬戶府事  
張瑄管領每年運糧以十分爲率該運六分本府 正官六員 達魯花赤一  
員 萬戶二員 副萬戶三員 首領官四員 經歷一員 知事一員 照  
磨兼提領案牘一員 提控案牘一員 令史六名 通事一名 奏差六名

合屬鎮撫二員 千戶三十三員 至元二十九年分作八翼 慶元浙江翼 江灣上海翼 青浦翼 崇明翼 許浦沿江翼 大場乍浦翼 青龍翼 顧逕下泖翼 元貞元年併爲四翼 青浦江灣翼 青龍顧逕翼 許浦崇明翼 大場慶元翼 大德七年再設六翼取知仁聖義忠和爲名 崇明知字翼青號 青浦仁字翼紅號 許浦聖字翼花號 青龍義字翼白號 大場忠字翼黃號 江灣和字翼黑號 百戶三十三員 一海運都漕運使達魯花赤萬戶府係驃騎衛上將軍江東道宣慰使兼領海道都漕運萬戶府事朱清每年運糧以十分爲率該運四分本府 正官五員 達魯花赤一員 萬戶二員 副萬戶二員 首領官四員 經歷一員 知事一員 照磨兼提領案牘一員 提控案牘一員 令史六名 通事一名 譯使一名 奏差六名 合屬鎮撫二員 千戶二十七員 至元二十九年作七翼

殷武略翼 朱忠顯翼 陳承務翼 蔡忠武翼 朱承信翼 丁忠武翼

趙國顯翼 至元三十年併爲二翼 殷武德陳承務翼 蔡忠武楊忠顯翼

百戶二十七員

二十九年二月海運水工每戶月給家屬五口糧免其差徭平章不忽朮平章  
闍里等奏淮海運梢工水手人等選擇堪用者顧備錢價如例給之每戶妻子  
以五口爲則與之糧免其雜泛差役

三十年十月以朱虞龍授明威將軍海道都漕運萬戶提調香糯事中書省奏  
以朱虞龍降虎符授明威將軍海道都漕運萬戶提調香糯事別降印信設千  
戶一百戶三制可

三十一年六月以軍四百守護河西務十二倉又調軍一千接江南新運 參  
政諳都刺等奏河西務沿河等處收貯米糧倉廩一十二處看守軍人四百名

如米糧發熟令軍人及斗腳人等挑到曝曬又奏海運朱張船隻自江南到時乞依去歲例調軍一千迎接鎮遏並從之

成宗皇帝元貞元年以歲豐海運止運三十萬石每石水運腳價減爲六兩五錢丞相完澤平章賽典赤等奏朱張海運往歲一百萬石或增其數亦常運之如值禾稼不收人民艱食海運多得濟毫懿州一帶迤東貧民多聚集時并高麗地數歲缺食亦仰此海運賑救今歲豐米賤若卽海運切恐未宜去歲會計見在糧數只運三十萬石今年如上年例亦運三十萬石在先每石腳價鈔八兩五錢後減去一兩今糧食諸物比往歲尤賤腳價內再宜減一兩每石作六兩五錢又奏每年斟酌海運糧米數以十分爲率張萬戶運六分朱萬戶運四分今朱萬戶言乞均分停運並從之

二年三月諭行省行臺諸司毋阻壞海道運糧都漕運萬戶府事聖旨諭行中

書省行御史臺宣政院通政院行泉府司宣慰司肅政廉訪司轉運司管軍官  
管民官應管公事官吏軍民站赤諸色人等據中書省奏海道都漕運萬戶府  
告說漕運糧斛恐有阻壞乞降添力聖旨事准奏海道都漕運萬戶府運糧其  
間諸衙門官吏人等不得擾攪沮壞如此曉諭之後沮壞者罪之運糧官吏等  
不依體例行事寧不知懼

大德二年五月以海運所頓香糯布囊完好者於下年復用中書省據海道都  
漕運萬戶府朱虞龍呈每歲海運上用細白粳糯并鼠耗附帶該一十一萬六  
千五百石合用夾布袋一十一萬六千五百條每條該布一疋每疋官價不下  
五兩計該中統鈔六千餘定針線不在其中和買布疋之時府司州縣無過分  
派鄉村動搖百姓是雖和買布疋須每家俵散成造如此動搖十萬餘戶方得  
完備裝運到都止將糧米支持其上項布袋仍於醴源倉八作司太倉收頓別

無用度日漸不無損壞今卑職參詳每歲起運上項白粳糯米糧船戶每石破耗三升明該是貼補折耗米數合於正糧布袋內添搭盛貯一體裝運不須別給布袋外據正附糧米合用布袋若於醴源倉入作司太倉等處累年積下數內分揀勘好數目差官比及二三月閒迤南裝糧之時先於裏河裝載前去江浙行省交割於內間有損壞去處官爲補洗不致虧官損民實爲兩便今宣徽院京畿都漕運司入作司見在勘中夾布袋二十三萬九千二百單七條其大德二年白粳米五萬石香莎糯米五萬石今依朱懷遠所言擬發夾布袋一十萬條除就用京畿運司見收勘中夾布袋六萬六千五百一十五條外不敷三萬三千四百八十五條於入作司見收勘中布袋內令京畿運司委官選揀給付仍令都漕運司押綱官管領收貯俟海道運糧朱張萬戶至驗數交割令本府收管順帶前去用度 咨江浙省都省准擬起運夾布袋二十萬條 筭付

戶部都省准擬於現在夾布袋內通起二十萬條就便行移合屬早爲依數運赴直沽令都漕運收貯伺候海運到來交割順帶前去

六年以海道運糧萬戶府官員本府自行舉保從張文彪言也江浙等處行中書省參知政事張文彪會驗卑職父子於至元十九年以來欽依世祖皇帝聖旨創開海道漕運糧斛今將二十餘年先行泉府司所設衙門四處運糧萬戶三十五員千戶百戶五百餘員至甚冗濫卑職於二十八年親赴都省陳說減併止設都漕運萬戶府二員在先年分運糧一百八十萬或一百五十萬石數目浩大本萬戶府以十分中合運六分除別蒙銓注都副達魯花赤二員外所用頭目依奉都臺定例從卑職父子驗數舉保諳知海道萬戶五員鎮撫二員千戶百戶各三十三員首領官四員押運糧斛近年以來本府所運多不過三十萬石元設官員其實太冗虛受俸祿中間多有衰老不任風水人員兼都

副達魯花赤往來通署兩府文字至甚不便以此卑職參詳既是每年額運糧米數少擬合除減本府止設達魯花赤一員正副萬戶四員首領官二員嘉定州置司所管頭目設立鎮撫二員千戶百戶各二十員非惟少裁冗濫實可省費俸鈔以後倘有增運糧數足能辦事亦不添設卑職在先建言創開海道若不舉明伏慮因而廢弛具呈都省已蒙准呈令通行選舉到後項諳知海道慣識風水官員開坐於後如蒙都省早賜定奪聞奏不致失誤來春裝運外據其餘歇下人員擬合依例給由到省求敘從優區用似望激勵後人又據江西等處行中書省參知政事張瑄呈切惟饋運糧儲始因諸河勞民費財僭運無成至元十九年欽依世祖皇帝聖旨創行海道般運經今二十餘年已是成效在先行泉府司設立衙門四處該設萬戶三十五員千戶百戶人等五百餘員官冗人濫不便多端至元二十八年男張文彪親赴都省陳言便利革罷減併止



設海道都漕運萬戶二處此時年分運糧一百八十萬石或一百五十萬石本萬戶府以十分中運六分除通行提調兩府都副達魯花赤二員本府達魯花赤一員別蒙都省鈐注外其餘所用頭目依奉都堂定例從卑職驗數舉保諳知海道萬戶五員千戶百戶各三十三員鎮撫二員首領官四員責付運糧勾當近年以來所運糧斛本府與朱萬戶府停半分運多不過三十五萬石元設官員實爲太冗非惟多費俸祿中閒亦有衰老不受風水之人又兼都副達魯花赤往來通署兩府事務甚不便當況近欽奉詔書釐政令未便等事以此大德四年有男張文彪究思元言與今事異擬除減外本府只設達魯花赤一員正副萬戶四員首領官二員鎮撫二員千戶百戶足可辦事如此具呈都省已蒙准擬繼舉諳知海道慣熟風水員名開具合受職役保呈都省定奪聞奏未奉明降卑職參詳運糧人員起自卑職與朱參政創行海道由此都省從准所

舉久而爲例蓋航海冒險輕生非歷練風濤壯年精健不能應當職名難同常調求備所歷今男張文彪所保官員的係諳知海道及自幼根逐父祖下海精練風水熟諳公務之人卑職衰老坐疾不任輔政卻緣初行海道創始艱難不易成就安忍坐視其廢卽日已是春暮裝糧時分在邇若不蒙早賜定奪誠致失誤今歲糧儲將來漸至敗壞爲此今重將已保員數職名開坐於後保結具呈照詳 本府元設官七十員 存設保陞四十九員 保陞散官一員達魯花赤 萬戶二員 副萬戶二員 經歷知事二員 鎮撫二員 千戶一十二員 就用二十員 千戶一十二員 百戶八員 減去二十九員 萬戶一員 提控案牘一員 照磨一員 千戶一十三員 百戶一十三員 七年十二月併海道糧運三萬戶府爲一設萬戶六員其屬鎮撫所一官二員海運千戶所十一每所官三員 中書省奏前者海道運糧立萬戶府三復併

爲一宜委付萬戶六員前孛可孫札刺兒斛沙的爲之長建康路達魯花赤阿里之子曰忽都魯撒刺兒次之餘萬戶四員以先所委色目漢人南人內謹慎并年月未滿及於內有才者四人如舊仍帶虎符乞創降虎符四又奏萬戶之下合委千戶鎮撫首領七十員內欽受宣命金牌六十七員就帶金牌者三十九創降牌面者二十八受勅牌者三員並從之

大德八年平江路開司署事當年交割前萬戶舊有海舶一百二十五萬料運糧 本府正官達魯花赤一員 萬戶二員 副萬戶三員 首領官經歷一員 知事一員 提領案牘照磨一員 提控案牘一員 令史一十名 通事一名 譯史一名 奏差一十名 合屬一十二處每處設司吏二名 鎮撫所官二員 海運千戶所一十一處 平江等處香莎糯米千戶所 達魯花赤一員 千戶二員 副千戶二員 嘉定等處千戶所 達魯花赤一員

千戶二員 副千戶三員 常熟所 崑山所 溫台所 崇明所 上海所 嘉興所 松江所 杭州所 江陰所 已上九所官員並如嘉定所之數

武宗皇帝至大四年十月海道運糧萬戶府舊設官六員尙書省增爲八員今復如舊數千戶所十一今併爲七鎮撫所仍舊設置 中書省奏運糧萬戶府官往歲六員尙書省添爲八員乞依舊六員又奏千戶所舊一十一處乞罷其四宜併崑山崇明爲一松江嘉定爲一杭州嘉興爲一常熟江陰爲一創設溫台慶紹所二并平江香糯所而爲七鎮撫所依舊設置並從之 本府官六員 達魯花赤一員 萬戶一員 副萬戶四員 千戶所一十一處併作七處 常熟江陰所 崑山崇明所 松江嘉定所 杭州嘉興所 已上四所平江路置司 溫台所 溫州路置司 慶紹所 慶元路置司 平江香糯所

鎮撫所 是年遣官同江浙行省提調運糧官講究海運久行良法中書啓奉皇太子令旨以爲講議海運差委刑部田侍郎仍委高參政等提調督責萬戶府官同講究久行良法今講究到船戶利病之由海運興廢之故議擬減運糧額去福建召顧擾名之弊增腳價充船戶應用不敷之資除免一切差徭少蘇民力棄遠就近裝糧以圖民便選重望長官提振大綱汰冗員千戶去除民蠹太倉蓋倉移府就彼置司易爲辦事各項便宜事理開具中覆都省除准擬減運糧額併去千戶所四處選官分職外其餘元議船戶免役等事未奉明降府司參詳海運利病如蒙照依本府官萬戶王少中與中書省差來官并提調官江浙行省參知政事高中奉講議已後運糧可以久行良法內除免船戶里正主首差徭改撥上江眞州等處糧斛浙西嘉興松江等處位下併各投下田糧收納本色裝發海運卻將上江等處糧米易鈔撥還投下及於太倉蓋倉收

糧海運移府就彼署事各所添設都目司吏辦事實爲官民便益開坐各項元擬事件省府送戶部議擬到下項事理 船戶增添腳價據溫台等處海運千戶所狀申溫台兩路船戶夏吉甫等狀告各有梯已海船於至大二年以來蒙官司召顧遞年承運官糧別無短少又吉甫等住居瀕海捕魚爲生接連福建之地至大四年十一月蒙官司召顧船隻見數聽候運糧此時吉甫等未曾支給腳價先蒙官司督併修理船隻以此吉甫等貸錢預爲收買桐油麻筋石灰木植等物顧匠修理船隻至皇慶元年正月內纔蒙官司放支一半腳價合用物料價值湧貴并本船合用梢水比之太倉加倍顧覓及置辦貢具梢水口糧又且盤費浩大況本處水程約有三千餘里纔到起程至卸糧梢水合用口糧計該九月比附太倉船戶五月開洋多用口糧四月所有官司召顧福建船隻裝糧到於直沽之時尙然優恤每石添支腳鈔二兩據吉甫等裝糧船隻內多

有捕魚小船今來官司若照浙西船戶般運支給腳價似爲偏負近承奉都府指揮備奉江浙省劄付減并改立千戶所往歲不照船戶住居遠隔越參雜管領今既從新理當隨宜更改數內慶紹溫台所卽係創改運糧一切事務令各官前去規辦擬於温州開置治所取勘船隻給散腳鈔催督起發除另行外今據見告卑所參詳夏吉甫等俱係捕魚爲生遞年官司自十月閒召顧拘畱船隻不能生理舉債收買物件修理船隻至次年正月纔方支給一半腳價收糴米糧顧募梢水加倍費用比及太倉先行往迴六千餘里裝糧了畢隨處開洋運赴直沽比附太倉船戶五月開洋多用口糧四月所得腳錢已用不敷若照依浙西船戶一體支給腳價實爲偏負至大元年溫台等處荒歉之時官司於太倉和顧船隻賑濟亦與腳價鈔四兩五錢至大四年浙西船戶到於福建經營本處召顧運糧亦行每石添支腳錢二兩議得夏吉甫等住居瀕海接連

福建遞年官司召顧船戶典妻賣女承運略舉温州路船戶陳孟四將一十三歲親女賣與温州樂清縣傅縣尉得中統鈔五錠起發船夫此等船戶到此極矣至大四年溫台兩路運糧回還在海遭風并直沽卸欠官糧出賣等船五十六隻二萬六千二百三十料又兼物料比之舊日色色增添有至十倍之上如蒙添給腳價庶幾船料日漸增加若勿添支轉見船戶消乏船隻事故理宜優恤既腳錢不虧則船戶無損申乞照詳至大四年奉江浙省符文備都咨省爲至大四年海運正糧二百五十七萬五千石除委刑部田侍郎馳驛前去咨請敬依委請本省官烏馬兒平章高參政提調督責元委官萬戶府官照依作去春夏合起糧料趁時裝發起運毋致耽悞仍與差去官刑部田侍郎萬戶王仲溫等一同從長講究已後可以久行良法擬定咨申奉此除春夏二運糧斛別行裝運所講究到海運利病數內一項運糧必合添支腳價資給船戶修造船



隻以國家辦事齊成先濟海運腳錢三十年前創始之初鈔法貴重百物價平此時江南米價每石中統鈔三兩運糧一石支腳鈔八兩五錢幾及米價三倍又於舊年九月十月之間撥降好鈔船戶得此趁時買物修造海船如造船一千料所用工料價錢不過一百定運糧一千石隨得腳錢一百七十定爲有餘利爭趨造船專心運料今則物重鈔輕造船物料十倍價高每年船隻必須修粘浮動貢具必合添辦所得不償所費船戶艱辛雖蒙每石添作至元鈔二兩其物價愈翔不敷其用況浙東温台慶元海船水程篤遠比到太倉裝糧處所海洋水程不下二千餘里難與附近船戶一體支給腳價今量擬遠者温台慶元船隻運糧每石帶耗添至元鈔一兩通作三兩其餘船隻裝運漕白粳米香糧每石添鈔六錢通作二兩六錢稻穀每石添鈔六錢通作二兩於九月十月之間俵散腳價以資給船戶修理船隻庶使船身貢具得以堅壯不致損失作

弊虧損官糧照得先爲講究各項事理數內船戶必合添支腳價已經移咨中書省照詳未准回示戶部議得溫台慶元顧到船戶經涉海洋旣比兩浙程遠每石帶耗量添腳價至元鈔二錢通作至元鈔二兩二錢外據香糯縹白香糧稻穀近年以來已曾量添別難再議如遇給散腳價行移本道廉訪司體察相應具呈照詳 元講議恤運糧船戶與免雜泛差役使之專心運糧庶得易爲成就照得至元三年十二月內欽奉聖旨節文但是運糧之戶除免里正首首雜泛差役及蒙省擬曉諭卽有船戶樂從造船有三十萬料裝運之際欽奉詔書內一款節文民間和顧和買一切雜泛邊遠軍人并大都至上都自備首思站戶外其餘不以是何戶計與民一體均當欽此其各路有司將運糧船戶復行差充里正首首生受已經講議有曰運糧船戶運官糧千石者除免本戶梯已苗糧四十石里正首首雜泛差使其餘多寡一體除免若有運糧一萬石之

上者役免不過四百石餘苗依例應當外據無田船戶依例優恤開申省府未奉明降講議之後其平江路合屬崑山州將温台千戶所副千戶劉居仁充本州里正著落催辦差稅將無催人戶所欠稅糧勒令劉居仁閉納過四千一十餘石俱有納獲倉鈔存照似此將船戶差充里正主首甚多俱有賠償糧斛若不將船戶免役切恐船戶將船出賣或詭寄他人不肯運糧所繫非輕謂財賦承佃戶討正是管領佃種賦財糧米甚爲優輕官司尙且與免里正主首差徭白雲宗僧人種田不納稅糧亦除里正主首其海運船戶自備已錢造船若以創造一千料船一隻工價油灰桅柁釘線板木等物價錢少者八百餘定裝糧一千石官給腳價二百定召顧梢水往迴口糧短般腳價除銷用外有不敷陪錢貼補起糧所給不及所費然後又令親身下海運至直沽交卸糧儲經涉海洋數萬餘里晝夜風濤棄生就死其落後家屬復被有司捉拏勒令應當里正

主首雜泛差役又將詭戶逃亡無徵糧斛監督賠納卽與財賦佃戶并白雲宗僧人實爲優劣不同將來船戶避重就輕海運廢弛深繫利害宜從省府移咨都省聞奏欽依先降聖旨除免里正主首差役或照已講議定驗糧免徵庶使船戶得以安養氣力專心運糧辦事可爲久長便益乞照詳照得先爲講究各項事理數內船戶自備船隻裝糧一千石爲則今各戶依舊輸納官糧止免四十石苗糧里正主首雜泛差役運至一萬石者止許免四百石差役餘糧依驗多寡與民一體均當已經移咨中書省照詳未准回示戶部照得至大四年三月十八日欽奉詔書內一款節該民間和顧和買一切雜泛差役除邊遠軍人并大都至上都自備首思站戶外其餘各驗丁產先儘富實次及下戶諸役下不以是何戶計與民一體均當應有執把除差聖旨懿旨所在官司就使拘收本部議得所言詭名稅糧合依已行歸併田主糧數著落佃地之人徵納毋得

似前勒令里正主首追賠除免雜泛差役一節擬合依例均當相應具呈照詳  
元講議船上江東寧國池饒太平等處裝糧不便又將湖廣江西等處起運  
糧米至眞州泊水灣與海船對裝其海船重大底小止可海內行使近年以來  
海運糧額添增坐下江東寧國池饒太平建康等路及眞州對裝糧斛勒令海  
船從揚子江逆流駕使前去裝發緣江內水勢湍急不常走沙漲淺山磯數多  
常於口內著淺糧船俱壞歲有之實爲不便切照浙西各路多有各投下財  
賦及嘉興松江府位下糧米約有百萬餘石遞年折收輕賚變糶價錢若將財  
賦等糧收納本色裝發海運卻將江南湖廣糧米令各路變鈔或折價錢撥完  
投下雖復官爲支付非唯船戶支裝快順不誤風汛亦免江河沙淺損失官糧  
之患官民兩便外有起運香糯米糧舊例亦在直沽交卸在後朱虎龍害眾利  
己要功同職將香糯米直赴大都醴源倉送納轉交河船般剝經過閘壩河船戶

偷盜夾雜虧折官糧交割短少揭借重債閉納稽畱日久歲終方回船戶消乏如蒙將上項香糯照依舊例與繼糧止於直沽交卸實爲良便已經備申未奉明降如將裝糧止於浙西起運香糯亦於直沽交卸實爲官民兩有便益照得先爲講議各項事理數內本省先擬嘉興松江歲科秋糧六十餘萬石并江淮財賦府年辦稅糧一百餘萬石江浙財賦府歲辦糧二十四萬餘石照依時估於係官錢內先行提撥卻將前項糧數以充海運已經移咨中書省照詳未准回示戶部議得嘉興松江兩路財賦田糧啓准充爲海運江浙等處財賦府稅糧約二十四萬餘石奏啟一體免糴海運相應外據香莎糯米旣已醴源倉下卸行之已久別難更改具呈照詳 元講議太倉創蓋倉廠收納浙西等路稅糧供給海運本萬戶府管軍萬戶總司并崑山州於太倉置司似此卻將十處千戶所裁減每所額設司吏四名都目一員照略案牘辦事照得本府旣管運

糧海船多於太倉劉家港等處灣泊在先年分運糧數少就浙西各路支裝海運近歲以來糧額增添督責海船直抵江東太平寧國池饒建康等處支裝緣海船多係大料真州以上江面窄狹水勢湍急山磯數多沂流而上損壞船糧年年有之浙西諸路相離太倉遠者不過三二百里近者百里之上裝糧之際顧覓裏河民船剝至太倉裝海船其間東量西折公私擾害不便況太倉正係灣泊海船人煙輳集去處每歲糧船俱於此處裝集整點起發開洋若於此處蓋倉收納浙西各路稅糧就移萬戶府於太倉置司裝發海糧卻將十處千戶所裁減四處止設六處鎮撫所香糯所依舊存設已經照勘得千戶所六處合該司吏四名計二十四名除見存應設司吏二十名外合添設四名都目八員照略案牘實爲公便及有本府達魯花赤阿散忽都魯與都省差來官刑部田侍郎親詣太倉劉家港起發至大四年夏運船略行踏視得太倉朱辛一房屋

東北朱家莊舊有房舍週圍空閑地基可以起蓋倉廩收頓官糧兼有萬戶府於此鎮守關防已經采畫圖本開坐申蒙省府移准中書省咨減併訖千戶所四處止設六處鎮撫所香糯所依舊存設革去千戶二十四員其元議蓋倉移府州於太倉置司添設各所都目司吏未蒙准擬今歲皇慶元年海運糧斛一百八十萬石跨涉一十七處裝發實是闕官辦事幸而完備今來府司參詳如蒙照依元議移咨都省擬於太倉起蓋倉廩收納浙西各路稅糧供給海運本萬戶府管軍萬戶總司并崑山州移於彼處置司每千戶所一處添作司吏四名都目各一員照略案牘一則革去冗員千戶蠹政害民之弊二則削除船戶舍近趨遠裝糧之勞實爲官民兩益已經申覆省府照詳未奉明降如准海道萬戶府所擬戶部議得崑山州太倉劉家港起蓋倉廩貯糧儲瀕靠大海中間恐有不測況兼運糧已久似難更張據運糧千戶所難同有司不須添設司



吏都目具呈照詳

仁宗皇帝皇慶二年十月增海運糧腳價浙東每石中統鈔一兩五錢其餘處所每石一兩中書省奏江浙行省言今歲海運糧船阻風損壞者多若弗增其腳價船戶艱辛又兼造船物料比之往歲價增數倍臣等議量其地理遠近比元腳價之上除浙東每石添中統鈔一兩五錢其餘處所每石添一兩奏可

大元海運記卷之下

歲運糧數

至元二十年該運糧四萬六千五十石運到四萬二千一百七十二石二斗二升五合事故糧八百七十七石七斗五合 至元二十一年該運糧二十九萬五百石運到二十七萬五千六百一十石事故糧一萬四千八百九十石 至元二十二年運糧一十萬石已運到糧九萬七百七十一石五斗五升事故糧九千二百二十八石四斗五升 至元二十三年運糧五十七萬八千五百三十石已運到糧四十三萬三千九百五石四斗事故糧一十四萬四千六百一十四石六斗 至元二十四年運糧三十萬石已運到糧二十九萬七千五百四十六石七斗事故糧二千四百五十三石三斗 至元二十五年運糧四十四萬石已運到糧三十九萬七千六百五十五石八斗六升事故糧二千三百四

十四石一斗四升 至元二十六年該運糧九十三萬五千石已運到九十一萬九千九百四十三石事故糧一萬五千五十七石 至元二十七年該運糧一百五十九萬五千石已運到糧一百五十一萬三千八百五十六石八斗事故糧八萬一千一百四十三石二斗 至元二十八年該運糧一百五十二萬七千二百五十石已運到糧一百二十八萬一千六百一十五石事故糧二十四萬五千六百三十五石 至元二十九年該運糧一百四十萬七千四百石已運到糧一百三十六萬一千五百一十三石六斗八升事故糧四萬五千八百八十六石三斗二升 至元三十年該運糧九十萬八千石已運到糧八十八萬七千五百九十一石五斗事故糧二萬四百八石五斗 至元三十一年該運糧五十一萬四千五百三十三石已運到糧五十萬三千五百三十四石事故糧一萬九百九十九石 元貞元年該運糧三十四萬五百石俱到 元

貞二年該運糧三十四萬五百石已運到糧三十三萬七千二十六石六斗事  
故糧三千四百七十三石四斗 大德元年該運糧六十五萬八千三百石已  
運到糧六十四萬八千一百三十六石九斗五升事故糧一萬一百六十三石  
五斗 大德二年該運糧七十四萬二千七百五十一石已運到糧七十萬五  
千九百五十四石五斗事故糧三萬六千七百九十六石五斗 大德三年該  
運糧七十九萬四千五百石俱到 大德四年該運糧七十九萬五千五百石  
已運到糧七十八萬八千九百十八石二斗七升事故糧六千五百八十一石  
七斗三升 大德五年該運糧七十九萬六千五百二十八石已運到糧七十  
六萬九千六百五十石事故糧二萬六千八百七十八石 大德六年該運糧  
一百三十八萬三千八百八十三石六斗三升已運到糧一百三十二萬九千  
一百四十八石一斗事故糧五萬四千七百三十五石五斗三升 大德七年

該運糧一百六十五萬九千四百九十一石三斗二升已運到糧一百六十二萬八千五百八石八斗七升事故糧三萬九百八十二石四斗五升 大德八年該運糧一百六十七萬二千九百九石八斗六升四合已運到糧一百六十六萬三千三百一十三石五斗九合事故糧九千五百九十六石三斗五升五合 大德九年該運糧一百八十四萬三千三石九斗已運到糧一百七十九萬五千三百四十七石一斗一升六合二勺事故糧四萬七千六百五十六石七斗八升三合八勺 大德十年該運糧一百八十萬八千一百九十九石五斗已運到糧一百七十九萬七千七十八石三斗七升五合二勺事故糧一萬一千一百二十一石一斗二升二合八勺 大德十一年該運糧一百六十六萬五千四百二十二石八斗五升五合三勺已運到糧一百六十四萬四千六百七十九石一斗七升八勺事故糧二萬七百四十三石六斗七升七合五勺

至大元年該運糧一百二十四萬一百四十八石四斗八升八合七勺已運到糧一百二十萬二千五百三石四斗七升三合九勺事故糧三萬七千六百四十五石一升四合八勺 至大二年該運糧二百四十六萬四千二百四石八斗已運到糧二百三十八萬六千三百石四斗八升一合事故糧七萬七千九百四石三斗一升九合 至大三年該運糧二百九十二萬六千五百三十三石六斗四升九合已運到糧二百七十一萬六千九百一十三石九斗九升五合事故糧二十萬九千六百一十九石六斗五升三合四勺 至大四年該運糧二百八十七萬三千二百十二石一斗已運到糧二百七十七萬三千一百六十六石一斗九升六合事故糧九萬九千九百四十五石九斗四合 皇慶元年該運糧二百八萬三千五百五石四斗七合已運到糧二百六萬七千六百七十二石八斗六升七合事故糧一萬五千八百三十二石五斗四升

皇慶二年該運糧二百三十一萬七千二百二十八石八升四合已運到糧六

十五萬四千三十六石一升五合事故糧一十五萬八千五百四十三石一斗

一合

食貨志至者二百一十五萬八千六百八十五石

延祐元年該運糧二百四十萬三千二百六

十四石四斗三升四合已運到糧二百三十五萬六千六百六石一斗二升二

合事故糧四萬六千六百五十八石三斗一升二合 延祐二年該運糧二百

四十三萬五千六百八十五石九斗九升八合已運到糧二百四十二萬二千

五百五合一斗九升二合事故糧一萬三千一百八十八石八斗六合 延祐三

年該運糧二百四十五萬八千五百十四石一斗八升五合已運到糧二百五

十三萬七千七百四十一石一斗八升五合事故糧一萬七百七十三石 延

祐四年該運糧二百三十七萬五千三百四十五石四斗三合已運到糧二百

三十六萬八千一百一十九石六斗四升二合事故糧七千二百二十五石七

斗六升一合 延祐五年該運糧二百五十五萬三千七百一十四石三斗一合已運到糧二百五十四萬三千六百一十一石五斗四升一合事故糧一萬一百二石七斗六升 延祐六年該運糧三百二萬一千五百八十五石八斗八升九合已運到糧二百九十八萬六千七百一十七石九斗七升八合事故糧三萬四千八百九十一石九斗一升一合 延祐七年該運糧三百二十六萬四千六石五斗六升七合已運到糧三百二十四萬七千九百二十八石一斗六升二合事故糧一萬六千七十八石四斗四升八勺 至治元年該運糧三百二十六萬九千四百五十一石五斗六升四合已運到糧三百二十三萬八千七百六十五石九斗一升九合八抄五撮事故糧三萬六百八十五石六斗四升四合九勺一抄五撮 至治二年該運糧三百二十五萬一千一百四十石及帶起附餘香白糯米一萬八千九百四十二石六斗一升二合已運到



糧三百二十四萬六千四百八十三石一斗五升七合事故糧二萬三千五百九十九石四斗五升五合 至治三年該運糧二百八十一萬一千七百八十六石九斗三升七合已運到糧二百七十九萬八千六百一十三石九斗六升三合事故糧一萬三千一百七十二石九斗七升四合 泰定元年該運糧二百八萬七千二百三十一石七斗八升九合已運到糧二百七萬七千二百七十八石三斗六升九合事故糧九千九百五十三石四斗二升 泰定二年該運糧二百六十七萬一千一百八十四石六升已運到糧二百六十三萬七千七百五十一石八斗九升四合事故糧三萬三千四百三十二石七斗五升 泰定三年該運糧三百三十七萬五千七百八十四石二斗八升已運到糧三百三十五萬一千三百六十二石三斗六升事故糧二萬四千四百二十一石九斗二升 泰定四年該運糧三百一十五萬二千八百二十石六斗六升已

運到糧三百一十三萬七千五百三十二石七斗七升事故糧一萬五千二百八十七石八斗九升 天曆元年該運糧三百二十五萬五千二百二十石四斗四升已運到糧三百二十一萬五千四百二十四石三斗事故糧三萬九千七百九十六石四斗四升 天曆二年該運糧三百五十二萬二千一百六十三石一斗已運到糧三百三十四萬三百六石二斗事故糧一十八萬一千八百五十六石九斗

收江南糧鼠耗則例

至元二十二年十月中書戶部呈依奉省筭照依江南民田稅石擬合依例每石帶收鼠耗分例七升內除養贍食官斗腳一升外六升與正糧一體收貯如有短折數目擬依腹裏折耗例以五年爲則準除四升初年一升二合次年二升三年二升四年三升四合五年共報四升餘上不盡數目追徵完官若有不

及所破折耗從實準算無得因而作弊多破官糧外據官田帶收鼠耗分例若依行省所擬比民田減半每石止收三升五合卻緣前項所破正糧擬合每石帶鼠耗分例五升似爲允當呈乞照詳議得除民田稅石依準戶部所擬外據官田擬依行省所咨減半收受都省移文江浙等處行中書省照驗定擬南北二糧耗例 至元二十五年十月省臣奏淮南糧每石帶耗一斗四升北糧七升定到省倉馬頭倉站車壩河船運各各合該數目劄付戶部去訖近據省倉馬頭倉官人等告稱見定破耗委實不敷不惟倉官破家艱辛官司積累懸欠數多公私不便令都堂再行圓議聞奏過下項各各合添耗糧例開例於後

南糧元破每石帶耗一斗四升 海運至直沽每石四斗 直沽每石一升三合 船運至河西務每石七合 河西務每石一升三合 船運至通州每石七合 通州每石一升三合 壩河運至大都每石一升站車運至大都每石

七合 省倉每石三升 今議每石帶耗一斗七升五合除元破外添三升五合 依舊破耗 海運至直沽每石破四升直沽一升三合添破耗糧搬運直沽至河西務每石一升二合 元破七合 添破五合 河西務破耗二升 元破一升三合 添破七合 船運河西務至通州每石破耗一升五合 元破七合 添破八合 通州倉二升 元破一升二合 添破七合 壩河站車運至大都每石破耗一升五合 元破一升 添破五合 省倉每石四升 元破三升 添破一升 北糧元破每石運至大都通破耗米七升河船運至河西務每石破五合 河西務每石破一升二合 盤船河西務運至通州每石破耗三合 通州倉每石破一升三合 站車運至大都每石五合 壩河運至大都每石七合 省倉每石二升五合 合議每石帶耗八升二合內除元破外添一升二合船運自唐村等處運至河西務每石破七合 元破五

合 添破二合 河西務倉每石一升五合 元破一升二合 添破三合  
船運河西務至通州每石破五合 元破三合 添破二合 通州倉每石破  
一升五合 壩河站車運至大都每石破耗一升 元破七合 添破三合  
省倉每石破三升 元破二升五合 添破五合

南北倉添鼠耗則例

至元二十六年閏十月省臣奏各倉官員告稱往歲定到鼠耗分例數少倉官  
賠償破其家產鬻其妻小者有之因此多欠糧數臣等圓議去年奏添南糧自  
直沽裏運至河西務每石元破七合今添五合河西務運至通州每石元破七  
合今添八合河西務倉內每石元破一升三合今添七合通州倉內每石元破  
一升三合今添七合壩河站車運至大都每石元破一升今添五合省倉內每  
石元破三升今添一升北糧內自唐村等處運至河西務每石元破五合今添

二合河西務倉每石元破一升二合今添三合河西務船運至通州每石元破二合今添二合通州倉每石元破一升三合今添二合壩河站車運至大都每石元破七合今添三合省倉每石元破二升五合今添五合奏可  
省臣奏准再定南北糧鼠耗則例

至元二十九年八月完澤丞相奏通州河西務倉官告說各倉收糧前省官定擬鼠耗分例數少至有鬻其妻子家產尙賠納不完至今辛苦臣等議得前省官所定鼠耗分例不勻如今南北耗各年分例比在先斟酌再定之上曰如卿所奏雖然亦合用心雀鼠待食用多少休因此教鰥人作弊爲盜欺詐依舊聽耗唐村等處船運至河西務北糧每石破七合直沽船運至河西務南糧每石破一升二合河西務船運至通州李二寺南糧每石一升五合北糧每石五合壩河站車運至大都省倉南糧每石一升五合北糧每石一升今議擬聽耗

例大都省倉元定破耗南糧每石四升北糧每石三升今議擬限年聽耗初年聽耗南糧每石二升北糧每石一升五合次年聽耗南糧每石三升北糧每石二升三合貯經三年以上依元定聽耗南糧每石四升北糧每石三升河西務通州李二寺元定破耗南糧每石二升北糧每石一升五合今擬限年聽耗初年依元定破耗南糧每石二升北糧一升五合次年聽耗南糧每石三升北糧每石二升三合貯經三年以上聽耗南糧每石四升北糧每石三升直沽倉除對船交裝不須破耗外今擬一年須要支運盡絕南糧每石聽耗二升元定破耗一升三合今擬添七合香糯白粳破耗大德三年中書省准戶部呈若依糙米例定奪緣糙粳米俱各散裝白粳香莎糯米終用夾布袋盛以此參詳擬合比附散裝糙米破耗定例三分中量減一分海運至直沽每石破耗八合河西務至通州李二寺每石破耗一升如直沽裝船經由通惠河徑赴大都交卸止

依至通州李二寺每石破耗一升八石

排年海運水腳價鈔

至元十九年欽奉聖旨剗開海運不給腳鈔就用係官海船官司召顧水手起運糧儲至楊村馬頭交卸講究水程自開洋上海等處至楊村馬頭計一萬三千三百五十里 至元二十一年依驗千斤百里腳價每石該支腳錢中統鈔八兩五錢九分今近海有力人戶自行造船顧募梢水依已定擬每石支鈔八兩五錢 至元二十九年減作每石七兩五錢 元貞元年十二月二十八日奏朱張海運糧在先每石腳錢八兩五錢減爲七兩五錢如今糧食諸物比之在先甚賤腳價亦合減若不減恐虧官臣等議每石宜減去一兩爲六兩五錢奏可本年爲頭糙白粳米就直沽交卸每石支中統鈔六兩五錢香糯直赴大都醴源倉交納每石增鈔五錢計七兩 大德七年起運稻穀二十萬石每石



腳錢中統鈔五兩 至大元年四月初十日奏過海運糧腳價每石六兩五錢  
如今糧食諸物湧貴量添五錢爲七兩已後不與照依先體例與六兩五錢  
至大三年准尙書省咨該本省咨至大三年海運糧斛差官召顧海船卽日諸  
物湧貴春運腳價每石添作至元鈔一兩六錢必是海道府先令本管船隻裝  
運所據召顧海船俱係福建浙東等處召顧至平江太倉劉家港裝運處所比  
附海道舊管船戶先去一二千里之遠日用口糧盤費偏負生受量添腳價官  
民兩便照得先咨運糧腳價費用不敷春運糧米每石量添至元鈔三錢通該  
至元鈔一兩六錢夏運糧斛止依舊例不須添支移咨依上施行今夏運糧船  
戶依准所擬照依春運例每石添支至元鈔三錢咨請照驗本年腳價糙白粳  
每石至元鈔一兩六錢香糯每石至元鈔一兩七錢 至大四年准中書省咨  
該尙書省准本省咨講究拯治海運至大三年十月二十九日奏准運糧腳價

每一石支至元鈔一兩六錢如今添爲二兩稻穀一石元支至元鈔一兩如今添爲一兩四錢至元鈔本年爲頭腳價糙白糧每石至元鈔二兩香糯每石至元鈔二兩八錢稻穀每石一兩四錢 延祐元年二月初二日海道府奉中書戶部符文備奉中書劄付 皇慶二年十月二十五日奏准斟酌地里遠近比元價之上添與腳錢本年爲頭糧斛腳價內福建遠船運糙粳每石一十三兩温台慶元船運糙粳每石一十一兩五錢香糯每石一十一兩五錢紹興浙西船每石一十一兩白糧價同稻穀每石八兩黑豆每石依糙白糧例支鈔一十一兩已後年分至今起運糙白粳香糯稻穀依前支價年例預支每歲八九月間海道府權依上年運糧額數爲則扣算先支六分腳價差官赴省關撥管押前去平江慶元温台官庫寄收候都省坐到糧數委定提調省官職名或十月十一月內海道府差官稟請省官親臨平江路提調給散除慶紹温台兩浙合

該腳價海道府差官前去與各路所委官一同給散外本省提調官或有事故改委左右司官前去僅及一月散訖還省海道府分派定春夏二運糧數差官赴省關撥貼支四分腳價次年正月間咨請提調官親詣海道府裝發糧斛給散貼支腳價直至五六月間夏運開洋了畢還省據天曆二年海運正糧三萬石腳價不等散過中統鈔六十四萬九千七百二十八定二十八兩五錢并增運附餘香白糯正糧三千四百七石三斗六升九合鈔七百三十八定三十四兩七錢四分三釐通計支散腳價鈔六十五萬五百一十二定一十三兩二錢四分三釐

漕運水程

至元十九年創開海運每歲糧船於平江路劉家港等處聚脍經由揚州路通州海門縣黃連沙頭萬里長灘開洋沿山捉嶼使於淮安路鹽城縣歷西海州

海寧府東海縣密州膠州界放靈山洋投東北取成山路多有淺沙行月餘才抵成山羅璧朱清張瑄講究水程自上海等處開洋至揚州村馬頭下卸處經過地名山川經直多少迂回計一萬三千三百五十里 至元二十九年朱清等建言此路險惡踏開生路自劉家港開洋遇東南水疾一日可至撐腳沙彼有淺沙日行夜泊守伺西南便風轉過沙嘴一日到於三沙洋子江再遇西南風色一日至匾擔沙大洪拋泊來朝探洪行駕一日可過萬里長灘透深才方開放大洋先得西南順風一晝夜約行一千餘里到青水洋得值東南風三晝夜過黑水洋望見沿津島大山再得東南風一日夜可至成山一日夜至劉島又一日夜至芝罘島再一日夜至沙門島守得東南便風可放萊州大洋三日三夜方到界河口前後俱係便風經直水程約半月可達如風水不便迂回盤摺或至一月四十日之上方能到彼倘值非常風阻難度程限明年又以糧船

自劉家港開洋過黃連沙轉西行使至膠西投東北取成山亦爲不便繼委千戶殷明略踏開生路自劉家港開洋至崇明州三沙放洋望東行使入黑水大洋取成山轉西至劉家島聚脰取薪水畢到登州沙門島於萊州大洋入界河至今爲便皆行北道風水險惡 至元十九年爲始年例糧船聚於劉家港入海由黃大郎鶯白茆撐腳唐浦等處一帶率皆沙淺其洪道闊卻無千丈長之潮兩向俱有白水潮退皆露沙地候得西南風順過匾擔沙東南大洪過萬里長灘透深開放大洋至青水洋內經陸家等沙下接長山并西南鹽城一帶趙鐵沙皆及半洋沙嚮沙匾擔等沙淺及至蘇州洋又有三沽洋山下八山補陀山到於黑水大洋過成山北面一帶并芝罘島登州一路木極島等處近沙門島山或鐵山嘴開放萊州大洋又有三山茅頭嘴大姑河小姑河兩頭河等灘及北有曹婆沙梁河沙南有劉姑蒲灘至界河海口復有灘淺狹洪沙硬潮汛

長落不常但遇東南風本處船聚稠密則有妨礙之虞上項所由各各險惡去處設遇風濤不甚猛惡可以預爲轉調躲閃或收入山島藏避守伺風平浪少然後行使若值不測驟風急雨巨颶湧浪危險之時或白晝迷霧蚤夜昏黑皆賴聖朝洪福天地神明護祐非人力所及 延祐三年正月海道都府據慶元紹興所申紹興路三江隄門至下蓋山一帶沙淺一百餘里名鐵板沙潮汛猛惡温台船隻尖底食水深浚船戶梢水不識三江水脈避怕險惡直至四月中旬尙於烈港等處停泊不敢前來差人搜究斷罪催趕顧覓剝船般剝緣剝船數少卒急不能尋顧尙於海岸屯貯委實靠損船戶不便據紹興六路下年海運糧斛如蒙照依皇慶二年例就用本路船料裝發若有不敷於慶元路標撥小料海運貼裝其温台福建船隻起發劉家港交割依舊於平江路倉裝糧官民兩便又準本府副萬戶抄兒赤目擊艱難必須改擬若台州有裝官糧先儘

本路船隻不敷於温州船內貼撥紹興路糧亦用本路船隻裝發不敷用慶元路小料海船貼裝其慶元府港深闊臨近路倉腳夫徑直擔米上船就將船舶并溫台所用不盡船料支裝倘有剩下船料及慶元路船隻差官押發劉家港交割裝糧兩便已經準擬標撥外據福建船舶依已行於慶元路支裝

記標指淺

至大四年十二月海道府據常熟州船戶蘇顯陳言立標指淺事再行會集老僧運糧千戶殷忠顯黃忠翊等講究得每歲糧船到於劉家港聚齊起發甘草等沙淺水暗素於糧船爲害不知水脈之人多於此上揆閣排年損壞船糧淪死人命爲數不少今蘇顯備已船二隻拋泊西暗沙觜二處豎立旗纓指領糧船出淺誠爲可采又畫到圖本備榜太倉周涇橋路漕宮前聚船處所曉諭運糧船戶起發糧船務要於暗沙東蘇顯魚船偏南正西行使於所立號船西邊

經過往北轉東落水行使至黃連沙幫拋泊候風開洋如是潮退號上桅上  
立旗纓糧船只許拋住不許行使若有不依指約因而湊淺損失官糧之人船  
主判院痛行斷罪所陷官糧臨事斟酌著落賠還以蘇顯所言於官有益於民  
有使例應陞擢申奉省府出給筭付令蘇顯祇受充指淺提領依上施行 延  
祐元年七月據常熟江陰千戶所申爲江陰州界揚子江內巫子門等處沙淺  
損壞糧船喚到本處住坐船戶袁源湯嶼講究得江陰州管下夏港至君山直  
開沙淺至馬馱沙南一帶至彭公山石牌山浮山巫子門鎮山石頭港雷溝陳  
溝九處約有一百餘里俱有沙淺暗焦江潮衝流陰惡潮長則一概俱沒潮落  
微露沙脊遞年支裝上江寧國等處糧船爲不知淺沙暗焦中間多有損壞宜  
從官司差撥附近小料船隻設立諳知水勢之人於每歲裝糧之際駕船於沙  
淺處立標常川在彼指引糧船過淺不致疎虞爲是江東各路船戶顧文寬林



德明等糧船俱於巫子門等處著落淺渰沒其餘不及枚數據袁源等所言實爲官民便益申奉省府給降劄付令袁源等充指淺提領照依議到事理預備船隻旗纓依上指淺施行 延祐四年十二月海道府承奉江浙行省劄付准中書省咨送戶部呈奉省判御史臺備監察御史呈每年春夏二次海運糧儲萬里海程渺無邊際皆以成山爲標準俱各定北行使得至成山轉放沙門島萊州等洋約量可到直沽海口爲無卓望不能入河多有沙湧淤泥去處損壞船隻合准所言設立標望於龍山廟前高築土堆四傍石砌以布爲旛每年四月十五日爲始有司差夫添力豎起日閒於上懸掛布旛夜則懸點火燈庶幾運糧海船得以瞻望部議合准監察御史所言令江浙行省計料成造旛竿繩索布旛燈籠蠟燭趁迭來春運糧時月發付海道萬戶府順帶至直沽交付有司收管於海門龍山廟前豎立晝則懸旛夜則掛燈伺候春夏二運糧船齊足

方許倒卸責付看廟僧人如法收掌次年趁時復立依上懸點如有損壞多少預爲中索相應都省准擬咨請依上施行

### 測候潮汛應驗

海道都漕運萬戶府前照磨徐泰亨曾經下海押糧赴北交卸本官紀錄切見萬里海洋渺無涯際陰晴風雨出於不測惟憑針路定向行船仰觀天象以卜明晦故船主高價召募慣熟梢工使司其事凡在船官糧人命皆所繫焉少有差失爲害甚大泰亨因而詢訪得潮汛風信觀象略節次第雖是俗說屢驗皆應不避譏哂綴成口訣以期便記誦爾

潮汛 前月起水二十五二十八日大汛至次月初五是下岸潮汛不會差今古次月初十是起水十三大汛必然理二十還逢下岸潮只隔七日循環爾  
風信 春後雪花落不止四箇月日有風水二月十八潘婆颶三月十八一般

起四月十八打麻風六月十九彭祖忌秋前十日風水生秋後十日亦須至八月十八潮誕生次日須宜預防避白露前後風水生白露後頭亦未已霜降時候須作信此是陰陽一定理九月二十七無風十月初五決有矣每月初三颶若無初四行船難指擬如遇庚日不變更來到壬癸亦須避

觀象 日落生耳於南北必起風雨莫疑惑落日猶如糖餅紅無雨必須忌風伯日沒觀色如胭脂三日之中風作厄若還接日有烏雲隔日必然風雨逼烏雲接日卻露白晴明天象便分得對日有垢雨可期不到巳申要盈尺雨餘晚垢橫在空來日晴明須可尅北辰之下閃電光三日之間事難測大雨若無風水生陰陽可以爲定則東南海門閃電光五日之內雲潑黑縱然無雨不爲奇必作風水大便息東北海門閃電光三日須防雲如織否則風水必爲憂屢嘗試驗無差忒

行船 遲了一朝搭一汛挫了一綫隔一山十日灘頭坐一日過九灘

### 艘數裝泊

艘數泊所年例以船料多少數目灣泊何處自何處開洋合用船隻依驗歲運糧數灣泊去處隨戶所居家步緣戶計消長遷移不常糧額增減無定況船有損舊必須修柁或以小船三五隻柁卸并造改作一二隻或因大料一船不堪卻將三二小船抵運因此艘數泊所俱無定籍今以至順元年爲率用船總計一千八百隻 崑山州太倉劉家港一帶六百一十三隻崇州東西三沙一百八十六隻海鹽澉浦一十二隻杭州江岸一帶五十一隻嘉定州沙頭浦官橋等處一百七十三隻上海浦等處一十九隻常熟白茅港一帶一百七十三隻江陰通州蔡港等處七隻平陽瑞安州飛雲渡等港七十四隻永嘉縣外沙港一十四隻樂清白溪沙嶼等處二百四十二隻黃岩州石塘等處一十一隻

烈港一帶三十四隻紹興三江隄門三十九隻慈溪定海象山鄞縣桃花等渡  
大高山堰頭慈嶼等處一百四隻臨海寧海嚴嶼鐵場等港二十三隻奉化揭  
崎昌國秀山等嶼一帶二十三隻 皇慶元年五月海道都府承奉江浙行省  
筭付爲慶紹千戶所官集眾講究得慶元地居東南旣於本處裝訖糧米再入  
劉家港取齊多有沙險去處若就定海港口放洋經赴直沽交卸實爲便益省  
府照得海運糧儲最爲重事浙東慶元紹興路糧斛旣已講究定就於定海開  
洋本府正官理合親臨督併起發仰卽便摘委廉幹府官一員速詣彼中點視  
完備趁時送風汛開洋毋致失誤具差定官職名起程日期飛申 延祐元年  
六月慶元紹興千戶范承直呈温台慶紹兩浙糧數前來劉家港交割裝糧今  
歲二月使至匯上港口多爲舂運重載相妨踏逐得常熟州白茅港水深內外  
堪可灣泊都府行據常熟江陰所申移准千戶忽林失奉議將帶指淺提領蘇

顯相視得白茆港合依年例令松江糧船自本港口上墩南至包橋一帶拋泊卻令溫台慶紹兩所糧船於包橋上塘一帶著泊開洋時分先令本處沿江船隻領艚出港照依指淺船隻開洋順便浙西平江路劉家港開洋一千六百五十三隻浙東慶元路烈港開洋一百四十七隻支裝糧船淺海皆知險惡其餘裝糧江河多有艱危去處亦不爲易今挨開到上江裏河支裝糧斛遠近里路安危地向如後上海裝糧海船自平江路嘉定州劉家港開船經由揚子江逆行使經行各處沙淺常損糧船平江路常熟州地面甘草等沙水淺委蘇顯指引江陰州地面淺沙暗焦九處約一百餘里夏港至君山直開馬馱沙面一帶至彭公山石碑山浮山巫子門鐵積沙鎮山石頭港雷溝陳溝委袁源湯嶼指引眞州泊水灣交裝江西湖廣糧自劉家港至彼約六百六十五里江東各路自眞州以上江西狹窄水勢緊急及蕪湖采石一帶山磯峽險每船一隻

小者亦用三五十人登山入水攀緣石木打號儘力一聲方牽一步延祐二年爲始申覆省府并提調官筭付各路如遇江狹磯淺湍急去處差倩人夫添力牽運船隻集慶路倉自劉家港至彼約九百四十里至太平路一百八十里共一千一百二十里至寧國路水陽倉三百六十里共一千四百八十里以上三路每歲海船可以抵岸支裝 延祐六年四月二十日據崑山崇明所千戶郭奉議申船戶駕使海船至黃池蕪湖港口爲是各船料大溪河淺澁不敢抵倉約離三五十里移準寧國路提調官總管宋中大夫等牒差官前去本路河岸及溧水州建平縣地面將應有船隻作急前來短般外合支水腳錢鈔令船戶就便支給本府移牒寧國路添力剝載池州路倉一百八十里共一千六百六十里在前年分本處短剝官糧至太平蕪湖江口交割水程三百五十里延祐四年奉省筭海船徑抵倉門 滿浦裝糧海船自揚州崇明州三沙黃連沙投

西過地名料角等處一帶沙淺連屬千里潮長則海水瀾漫淺深莫測潮落則僅存一溝寸步萬險若船料稍大必致靠損難計里路 浙西裝糧路分皆是船戶顧覓河船短剝糧斛般上海船今以崑山州太倉聚船去處至九路倉分平江路一百八里無錫州一百九十八里常州路二百八十八里內三倉係在城置立河道淺狹用小料河船逐旋般至城外裝入剝船海鹽州三百四十里湖州路三百十八里松江府三百六十里海船至花涇塘灣泊離倉約一十二里小船般剝烏泥涇四百八十六里海船於黃浦口灣泊離倉約七里用小船般剝江陰州四百五十里海船於黃田港灣泊離倉約三里用小船般剝鎮江路六百八十里糙米倉在香糯倉之北用小車搬運約二三里至鱈魚港壩頭用小船剝上海船香糯倉之南用小車運至河船約三二里到鱈魚港壩頭用小船剝上海船轉摺生受 浙東裝糧路分紹興路三江陡門至下蓋山一帶



河淺一百餘里名爲鐵板沙必用本路諳知地勢海船并慶元路小料船隻裝運本路官倉至海船灣泊處三江隄門有小河水程一百八十里顧覓河船短剝台州路長田港沙淺用本路海船支裝官倉至南門外泊船處約離三里腳夫挑擔上船慶元路府港深闊臨近路約一里腳夫挑擔上船

大元海運記二卷胡書農學士輯自永樂大典本蓋卽經世大典之海運一門也按天曆二年九月勅翰林國史院官同奎章閣學士采輯本朝典故準唐宋會要著爲經世大典八十卷今已佚僅散見永樂大典中元史食貨志依據經世大典爲目十有九是編上卷分年紀事多錄案牘之文自至元十九年迄皇慶二年止不解延祐至治泰定天曆閒事何以不載下卷分類紀事曰歲運糧數曰收江南糧鼠耗則例曰南北倉鼠耗則例曰再定南北糧鼠耗則例曰排年海運水腳價鈔曰漕運水程日記標指淺曰測候潮汛應驗曰艘數裝泊

經按

世大典至順三年二月進呈故是條艘數以至順元年爲率

海運爲有元一朝規制初則江浙以外兼之江

西湖廣大德以後專運江浙春夏兩運自四萬六千餘石增至三百餘萬石考元時江浙省財賦府歲入四百四十九萬四千七百八十三石則江浙全漕亦不盡充海運耳按元史百官志海運千戶凡五所平江又有糯米所是編載千

戶初設十有一後併爲七尙有松江嘉定所志文遺漏世祖本紀至元二十七年四月書罷海道運糧萬戶府是編載二十八年八月罷行泉府司所隸運糧二萬戶府併設二處先是二十四年立行泉府司增置萬戶府二至是罷之紀不書明竟似全罷矣且相差一年又本紀至元二十年十二月以海道運糧招討使朱清爲中萬戶賜虎符張瑄子文虎爲千戶賜金符是編先載朱清爲中萬戶張瑄爲千戶復言張招討之子見帶銀牌換金牌爲千戶而不載其名後屢言張瑄之男爲張文彪而無張文虎又本紀至大三年十二月以朱清子文虎張瑄子文龍往治海漕以所籍宅一區田一頃給之是編未載及當至元二十四年時有張文龍朱虎勾當之名朱清張瑄元史無傳按朱清崇明人張瑄嘉定人少曾爲盜既入元致位通顯宗戚皆累大官廝養佩虎符金銀符者百數田園館舍徧東南一時貴盛人莫與比大德七年樞密斷事官曹拾得江南

僧石祖先後構之皆逮獄論死創行海運之功自不可沒其事蹟詳見元史類編及兩縣舊志文虎瑄中子從管軍總把擢至江浙參政被家難亦誅於西市其事蹟詳見王梧溪集又本紀至元十九年賞朱雲龍漕運功授七品總押是編載至元三十年以朱虞龍授明威將軍海道都漕運萬戶是否一人俟考歲運糧數自至元二十年迄天曆二年凡四十七年全采入食貨志但不載斗升以下數及事故糧數其皇慶二年運到之數是編六十五萬四千三十六石一升五合食貨志則云二百一十五萬八千六百八十五石以事故糧數核之食貨志之數爲是是編又有運到事故兩數不符及與食貨志小有不符之處必爲是編傳寫之譌參以元史類編悉爲校正至元二十年事故糧數應增三千石至元二十三年該運糧數三十石

爲是編傳寫之譌參以元史類編悉爲校正至元二十年事故糧數應增三千石至元二十三年該運糧數三十石

三爲二之誤元史類編運到糧數五石作五斗五升五合三勺運到糧數一斗七升

斗爲升之誤大德十一年該運糧數八斗五升五合三勺運到糧數一斗七升

八勺事故糧數六斗七升七合五勺必有一誤至大三年運到糧數三百一十四勺

應作四合元史類編該運糧數三石作二石誤至大四年運到糧數一百一十四勺

二之誤延祐三年運到糧數五十五石四之誤事志糧數一萬一為二之誤延祐六年事故糧數九十一石應作六十七石食貨志運到糧數脫去七百延祐七年事故糧數四升八勺應作五勺至治二年該運糧數食貨志不載帶起附餘香白糯米數泰定二年事故糧數七斗五升應該作一斗六升六合食貨志運到糧數脫

到七百

每年該運糧數浮於定額迺事故糧內例應賠償者入下年帶運之

故唯天曆二年已運到糧有三百三十四萬餘石事故糧祇有一十八萬餘石本紀是年九月書海運糧至京師凡一百四十萬九千一百二十石紀志歧異虞道園學古錄中亦云是年不至者蓋七十萬不解何以不相符合是編下卷內作潮汛風信觀象口訣之徐泰亨其人為餘杭人曾以漕事至京師詣都堂條陳漕運之弊當更張者十事有海運紀原七卷惜其書不得見幸學士輯存是編俾傳抄行世尙可參攷而得其崖略云爾咸豐壬子七月十有一日羅以智鏡泉氏跋於恬養齋

# 元海運志

元 臨川危 素太樸撰

元都于燕去江南極遠而百司庶府之繁衛士編民之眾無不仰給於江南自丞相伯顏獻海運之言而江南之糧分爲春夏一運蓋至於京師者一歲多至三百萬餘石民無輓輸之勞國有儲蓄之富豈非一代之良法歟初伯顏平江南時嘗命張瑄朱清等以宋庫藏圖籍自崇明州從海道載入京師而運糧則自浙西涉江入淮由黃河逆水至中灤旱站陸運至淇門入御河以達于京後又開濟州泗河自淮至新開河由大清河至利津河入海因海口沙壅又從東阿旱站運至臨清入御河又開膠萊河道通海勞費不貲卒無成效至元十九年伯顏追憶海道載宋圖籍之事以爲海運可行於是請于朝廷命上海總管羅璧朱清張瑄等造平底海船六十艘運糧四萬六千餘石從海道至京師然

擄行海洋沿山求嶼風信失時明年始至直沽時朝廷未知其利是年十二月立京畿江淮都漕運司二仍各置分司以督綱運每歲令江淮漕運司運糧至中灤京畿漕運司自中灤運至大都二十年又用王積翁議令阿入赤等廣開新河然新河候潮以入船多損壞民亦苦之而忙兀斛言海運之舟悉皆至焉於是罷新開河頗事海運立萬戶府二以朱清爲中萬戶張瑄爲千戶忙兀斛爲萬戶府達魯花赤未幾又分新河軍士水手及船于揚州平灤兩處運糧命三省造船二千艘於濟州河運糧猶未專於海道也二十四年始立行泉府司專掌海運增置萬戶浙二總爲四府是年遂罷東平河運糧二十五年內外分置漕運司二其在外者于河西務置司領接運海道糧事二十八年又用朱清張瑄之請併四府爲都漕運萬戶府二止令清瑄二人掌之其屬有千戶百戶等官分爲各翼以督歲運至大四年遣官至江浙議海運事時江東寧國池饒

建康等處運糧率令海船從揚子江逆流而上江水湍急又多石磯走沙漲淺糧船俱壞歲歲有之又湖廣江西之糧運至真州泊入海船船大底小亦非江中所宜於是嘉興松江秋糧并江淮江浙財賦府歲辦糧充運海漕之利蓋至是博矣初海運之道自平江劉家港入海經揚州路通州海門縣黃連沙頭萬里長灘開洋沿山嶼而行抵淮安路鹽城縣歷西海州海寧府東海縣密州膠州界放靈山洋投東北路多淺沙行月餘始抵成山計其水程自上海至楊村馬頭凡一萬三千三百五十里至元二十九年朱清等言其路陰惡復開生道自劉家港開深至撐腳沙轉沙觜至三沙洋子江過匾擔沙大洪又過萬里長灘放大洋至青水洋又經黑水洋至成山過劉島至之罘沙門二島放萊州大洋抵界河口其道差爲徑直明年千戶殷明略又開新道從劉家港入海至崇明州三沙放洋向東行入黑水大洋取成山轉西至劉家島又至登州沙門



島於萊州大洋入界河當舟行風信有時自浙西至京師不過旬日而已視前二道爲最便云然風濤不測糧船漂溺者無歲無之間亦有船壞而棄其米者至元二十三年始責償於運官人船俱溺者乃免然視河漕之費則其所得蓋多矣

附錄

元自世祖用伯顏之言歲漕東南粟由海道以給京師始自至元二十年至于天曆至順由四萬石以上增而爲三百萬以上歷至元後歲運之數漸不如舊至正元年益以河南之粟通計江南三省所運止得二百八十萬石二年又令江浙行省及中正院財賦總管府撥賜謁人寺觀之糧盡數起運僅得二百六十萬石而已

元史食貨志

朱張海餉自三山大洋徑至燕京且言自古所未嘗行此道昉自今始然壯少

陵出塞詩云漁陽豪俠地擊鼓吹笙竽雲帆轉遼海粳稻來東吳越羅與楚練  
照耀輿臺軀又昔游詩云幽燕夙用武供給亦勞哉吳門持粟帛汎海凌蓬萊  
然則自昔燕地皆海運非始于今矣

浩然齋  
聽抄

海漕運米南上給餉京師內置漕運使司暨萬戶府于京畿外立都漕運萬戶  
府于吳會歲運米三百五十萬石北抵直沽漕運萬戶之在內者部署其官數

往翼舟航交受所運達之京倉朝廷又選官接臨交護名曰接運

柳待  
副集

世祖定都于燕合四方萬國之眾仰食于燕以中吳水所聚也故建漕府萬艘  
如雲畢集海濱之劉家港于是省臣漕臣齋戒卜吉于天妃靈慈宮卜既協吉  
仍率其屬鳴金鼓以統漕建纛置牙莫敢復先每歲春夏運糧舟將抵直沽卽  
分都漕運官出接運中書省復遣才幹重臣從至海濡交卸石以數百萬計而  
較計至于合勺顆粒畸不得虧盈不得溢是亦難矣

玩齋  
集

元海運自朱清張瑄始歲運江淮米三百餘萬石以給元京四五月南風至起運得便風十數日卽抵直沽交卸朝廷以二人之功立海運萬戶府以官之賜

鈔印聽其自印鈔色比官造加黑印朱加紅

草木子

朱清張瑄者海上亡命也久爲盜魁出沒險阻若風與鬼刼略商販人甚苦之至元二十一年伯顏建議海運乃招二人授以金符千戶押運糧三萬五千石仍立海道萬戶府三以清瑄與羅璧爲萬戶轄千戶百戶所領虎符金牌素銀牌船大者不過千石小者三百石自劉家港出揚子江盤轉黃連沙嘴月餘始至淮口過膠州牢山一路至延眞島望北行轉成山西行到九皋島劉公島沙門島放萊州大洋收界河兩月餘抵直沽實爲繁重至元二十六年增糧八十八萬石二月開洋四月直沽交卸五月還復運夏糧至八月回一歲兩運是時船小人多恐懼至元二十七年朱萬戶請長興李福四押運自揚子江開洋落潮

東北行離長灘至白水綠水經黑水大洋北望延真島轉成山西行入沙門開  
萊州大洋進界河不過一月或半月至直沽漕運利便是歲加朱爲浙江省參  
政張爲浙江鹽運司都運如此者二十餘年大德七年船兩浙上戶自造船與  
腳價十一兩五錢分撥春夏二運延祐以來各造海船大者八九千小者二千  
餘石歲運三百六十萬石京師稱便迤南番貢亦通蓋自上海至直沽內楊村  
馬頭凡一萬三千三百五十里不出月餘可以達省費不貲若長樂港出福州  
經崇明以北又自古未有之利也我朝洪武三十年猶倣其制歲運七十萬石

以給遼東至永樂閒通會河成始不復講

廣輿圖

按海運之法自秦已有之而唐人亦轉東吳粳稻以給幽燕然以給邊方之用  
而已用之以足國則始于元焉考元史論海運有云民無輓輸之勞國有儲蓄  
之富又云海運視河運之數所得益多故終元之世海運不廢作元史者皆國

初史臣生長勝國習見海運之利所言非無徵者我朝洪武三十年海運糧七十萬石給遼東軍餉永樂初海運糧七十萬石至北京至十三年會通河通利始罷海運竊以爲自古漕運所從之道有三曰陸曰河曰海河漕視陸運之費省什三四海運視陸運之費省什七八今漕河通利歲運充積固無資于海運也然會通一河辟則人之咽喉一日食不下咽卽有死亡之禍請于未事之先而爲意外之慮尋元人海運之故道別通海運一路以與河漕竝行江西湖廣江東之粟照舊河運而以浙東西瀕海一帶由海道運使人習知海道一旦漕渠少有滯塞此不來而彼來亦思患預防之先計也夫海運之利以其放洋而其險也亦以其放洋欲免放洋之害宜預遣習知海道者訪問傍海居民漁戶竈丁逐一次第踏視有無泊舟港汊沙石多寡洲渚遠近委曲爲之設法圖畫具本以爲傍海通運之法是亦良便且元史備載海運歲至之數所失不過百

分之三四竊恐今日河運之糧所失不止此數況海運無剝淺之費無挨次之  
守而國家亦有水戰之備可以制伏朝鮮安南邊海之人誠萬世之利也

大學  
衍義

補

中華民國貳拾五年九月重印

(實價國幣七角五分)